

博異志 集異記

〔唐〕谷神子撰

〔唐〕薛用弱撰



古小說叢刊



B744/55

古小說叢刊

博異集
異志
異記

〔唐〕谷神子撰

〔唐〕薛用弱撰

中華書局

A 788619



博異志、集異記

〔唐〕谷神子撰、〔唐〕薛用弱撰

*

中華書局出版

（北京王府井大街36號）

新華書店北京發行所發行

北京第二新華印刷廠印刷

*

787×1092毫米 1/32·5印張·83千字

1980年12月第1版 1980年12月北京第1次印刷

印數 1—30,500冊

統一書號：10018·457 定價：0.48元

出版說明

《博異志》是一本比較著名的唐人傳奇集。作者谷神子，見于本書自序。宋晁公武《郡齋讀書志》（衢州本卷十三）說：「或曰名還古，而不知其姓。」明胡應麟《少室山房筆叢》卷三十六《二酉綴遺》中認為即唐代詩人鄭還古。後人多從此說。余嘉錫《四庫提要辨證》又為之找出了一些佐證，大致可以肯定。

本書原名《博異志》，《新唐書·藝文志》和宋人書目著錄都是如此。明人刻本如《古今逸史》等題作《博異記》，《四庫全書》本也作「記」，當為後人所改。原書三卷，宋人著錄如《郡齋讀書志》等作一卷，大概已有散佚。現以《顧氏文房小說》本為底本，加以點校，另據中華書局版汪紹楹校本《太平廣記》輯錄佚文，作為補編，附印于後。《太平廣記》引本書出處或作《博異記》，或作《傳異記》，似即《博異志》之譌，現一併輯入，在附注中加以說明。傳為馮贄編纂的《雲仙雜記》卷九引有《博異志》的《一杯羹三萬錢》、《縑繫南山樹》兩條，不像是本書的佚文，今不錄。

《集異記》也是一本常為人引用的唐人傳奇集。作者薛用弱，字中勝，長慶中光州刺史（見《新唐書·藝文志》），大和初自儀曹郎出守弋陽，為政嚴而不殘（見《太平廣記》卷三一二引《三

水小牘》。原書三卷，宋以後或作二卷，或作一卷。本書用作底本的《顧氏文房小說》本只有十六條，不是完本。清人陸心源曾據《太平廣記》輯錄佚文四卷，編入《羣書校補》。但《廣記》引書常有錯誤，未必都出自薛用弱的書。如卷二七六《張天錫》條，原注「出李產集異傳」，當爲郭季產《集異記》之譌，魯迅已輯入《古小說鉤沉》，現在就不再收錄。又如卷二七六《孫氏》條，卷三六八《劉玄》條、《游先朝》條，也不像薛著，現在附錄于後，以備查考。另外，宋人的《新編分門古今類事》中也引有《集異記》，只輯錄了《鄭綰拜相》一條，其餘除《佐卿留箭》一條已見本書外，還有《殺狐之兆》一條，記契丹耶律氏事，顯然不是薛著。《太平御覽》等書所引《集異記》，魯迅都輯入郭季產《集異記》，現在一概不收。補編部分全部用汪校本《太平廣記》覆核。有關校輯的情況，請參看各條後的附注。

這兩種書的點校工作，最初由王達津同志承擔；又經編輯部同志作了整理加工，並輯錄了補編部分。遺誤不當之處，希望讀者指正。

中華書局編輯部

一九八〇年二月

目錄

卷一

徐佐卿	一
王積薪	二
平等閣	三
裴珙	四
蕭穎士	五
韋宥	六
蔡少霞	六
卷二	
集翠裘	九
王維	九
王渙之	一一

補編

張鑑	一二
裴通遠	一二
邢曹進	一三
韋知微	一四
狄梁公	一四
寧王	一五
葉法善	一六
王四郎	二一
李清	二二
玉女	二五
趙操	二六

符契元	二七
茅安道	二八
石旻	二九
李子牟	二九
奚樂山	三〇
阿足師	三一
殭僧	三二
王安國	三二
汪鳳	三四
賈人妻	三五
魏淑	三六
李欽瑤	三六
高元裕	三七
衛庭訓	三八
崔圓	三九

張光晟	三九
李納	四〇
沈聿	四一
永清縣廟	四三
凌華	四四
劉元迴	四五
馬總	四六
蔣琛	四七
陳導	五一
趙叔牙	五二
劉惟清	五三
鄔濤	五四
李佐文	五五
金友章	五六
于凝	五七

宮山僧	五八
李楚賓	五九
張式	六〇
徐智通	六一
裴用	六一
李勉	六二
嘉陵江巨木	六二
江淮市人桃核	六四
光化寺客	六四
劉禹錫	六五
裴越客	六五
丁巖	六六
王瑤	六八
崔韜	六八
楊褒	六九

鄭韶	七〇
柳超	七〇
范翊	七一
盧言	七一
齊瓊	七二
田招	七三
裴度	七三
胡志忠	七四
李汾	七五
崔商	七五
徐安	七六
僧晏通	七七
薛夔	七七
朱覲	七八
裴仙	七八

鄧元佐……………七九

孫氏……………八〇

劉玄……………八〇

游先朝……………八〇

朱休之……………八一

張華……………八一

鄭綏拜相……………八二

附錄……………八三

集異記卷第一

河東薛用弱撰

徐佐卿

明皇天寶十三載重陽日獵於沙苑，雲間有孤鶴徊翔焉。上親御弧矢，一發而中。其鶴則帶箭徐墜，將及地丈許，歛然矯翰西南而逝。萬衆極目，良久乃滅。益州城距郭十五里，有明月觀焉，依山臨水，松桂深寂。道流非修習精懃者，莫得而居。觀之東廊第一院，尤爲幽絕。每有自稱青城道士徐佐卿者，風局清古，一歲率三四而至焉。觀之耆舊，因虛其院之正堂，以俟其來，而佐卿至則棲焉。或三五日，或旬朔，言歸青城，甚爲道流之所傾仰。一日忽自外至，神爽不怡，謂院中人曰：「吾行山中，偶爲飛矢所加，尋已無恙矣。然此箭非人間所有，吾留之於壁上，後年箭主到此，卽宜付之，慎無墜失。」仍援毫記壁云：「留箭之時，則十三載九月九日也。」及玄宗避狄幸蜀，暇日命駕行遊，偶至斯觀。樂其佳景，因遍幸道室。既入此堂，忽覩掛箭，則命侍臣取而玩之，蓋御箭也。深異之，因詢觀之道士，皆以實對。卽視佐卿所題「一」，乃前歲沙苑縱畋之日也。佐卿蓋中箭孤鶴耳。究其題，乃沙苑翻飛當日集於斯歟。上大奇之，因收其箭而寶

焉。自後蜀人亦無復有逢佐卿者矣。

「一」視原作「是」，據《廣記》卷三六引《廣德神異錄》改。

王積薪

玄宗南狩，百司奔赴行在，翰林善圍棋者王積薪從焉。蜀道隘狹，每行旅止息中道之郵亭人舍，多爲尊官有力者之所見占。積薪棲棲而無所入，因沿溪深遠，寓宿於山中孤姥之家。但有婦姑，止給水火。纔暝，婦姑皆闔戶而休。積薪棲于簷下，夜闌不寐。忽聞堂內姑謂婦曰：「良宵無以爲適，與子圍棋一賭可乎？」婦曰：「諾。」積薪私心奇之。況堂內素無燈燭，又婦姑各處東西室。積薪乃附耳門扉，俄聞婦曰：「起東五南九置子矣。」姑應曰：「東五南十二置子矣。」婦又曰：「起西八南十置子矣。」姑又應曰：「西九南十置子矣。」每置一子，皆良久思惟。夜將盡四更，積薪一一密記，其下止三十六。忽聞姑曰：「子已敗矣，吾止勝九枰耳。」婦亦甘焉。積薪遲明具衣冠請問，孤姥曰：「爾可率己之意而按局置子焉。」積薪卽出橐中局，盡平生之秘妙，而布子未及十數，孤姥顧謂婦曰：「是子可教以常勢耳。」婦乃指示攻守殺奪救應防拒之法，其意甚略。積薪卽更求其說，孤姥笑曰：「止此已無敵於人間矣。」積薪虔謝而別。行十數步再詣，則已失向之室間矣。自是積薪之藝絕無其倫。卽布所記婦姑對敵之勢，罄竭心力，較其九枰之勝，

終不得也。因名「鄧艾開蜀勢」。至今棋圖有焉，而世人終莫得而解矣。

平等閣

隋開皇中，釋子澄空，年甫二十，誓願於晉陽汾西鑄鐵像，高七十尺焉。鳩集金炭，細求用度，周二十年，物力乃辦。於是告報遐邇，大集賢愚，然後選日而寫像焉。及烟焰息滅，啓鑪之後，其像無成。澄空卽深自咎責，稽首懺悔，復堅前約，再謀鑄造。精勤艱苦，又二十年，事費復備。則又告報遐邇，大集賢愚，然後選日而寫像焉。及啓鑪，其像又復無成。澄空於是呼天求哀，叩佛請罪，大加貶挫，深自勤勵。又二十年，功力復集。乃告遐邇，大集賢愚，然後選日而寫像焉。及期，澄空乃登鑪巔，百尺懸絕，揚聲謂觀者曰：「吾少發誓願，鑄寫大佛，今年八十，兩已不成。此更違心，則吾無身以終志矣。況今衆善虛費積年，如或踵前失，吾亦無面目見衆善也。吾今俟其啓鑪，欲於金液而捨命焉。一以謝愆於諸佛，二以表誠於衆善。儻大像圓滿，後五十年，吾當爲建重閣耳。」聚觀萬衆，號泣諫止，而澄空殊不聽覽。俄而金液注射，赫耀踴躍。澄空於是揮手辭謝，投身如飛鳥而入焉。及開鑪，鐵像莊嚴端妙，毫髮皆備。自是并州之人咸思起閣以覆之。而佛身洪大，功用極廣，自非殊力，無由而致。開元初，李暠充天平軍節度使，出游，因仰大像歎曰：「如此相好，而爲風日所侵，痛哉！」卽施錢七萬緡。周歲之內，而重閣成就，只今

北都謂之平等閣者是也。計僧死像成之日，至暘，正五十年矣。以釋法推之，則暘也得非澄空之後身歟？

裴珙

裴孝廉珙者，家在洛京。仲夏自鄭西歸，及端午以覲親焉。下駟蹇劣，日勢已晚，方至石橋，於是驅馬徒行，情顧甚速。續有乘馬而牽一馬者，步驟極駿，顧珙有仁色。珙因謂曰：「子非投夕人都哉？」曰：「然。」珙曰：「珙有懇誠，將丐餘力於君子，子其聽乎？」即以誠告之。乘馬者曰：「但及都門而下，則不違也。」珙許約。因顧謂己之二僮曰：「爾可緩驅疲乘，投宿於白馬寺西，吾之表兄竇溫之墅，來辰徐歸。」因上馬揮鞭而驚。俄頃至上東門，遂歸其馬，珍重而別。乘馬者馳去極速。珙居水南，日已半規，即促步而進，及家暝矣。入門，方見其親與珙之弟妹張燈會食。珙乃前拜，曾莫顧瞻，因俯階高語曰：「珙自外至。」即又不聞。珙即大呼弟妹之名字，亦無應者，笑言自若。珙心神忿惑，因又極叫，皆亦不知。但見其親顧謂卑小曰：「珙在何處，那今日不至耶？」遂涕下，而坐者皆泣。珙私怪曰：「吾豈爲異物耶？何其幽顯之隔如此哉！」因出，至通衢，徘徊久之。有貴人導從甚盛，遙見珙，即以鞭指之曰：「彼乃生者之魂也。」俄有佩囊韉者，出於道左曰：「地界啓事，裴珙孝廉，命未合終，遇昆明池神七郎子案鷹迴，借馬送歸以爲戲耳。」

今當領赴本身。」貴人微哂曰：「小兒無理，將人命爲戲，明日與尊父書，令答之。」既至，而橐鞬者招珙復出上東門，度門隙中，至竇莊。橐鞬者令其閉目，自後推之，省然而蘇。其二僮皆曰：「向者行至石橋，察郎君疾作，語言大異，懼其將甚，因投於此。既至則已絕矣。」珙驚嘆久之，少頃無恙。及歸，乃以其實陳於家。余於上都自見竇溫，細話其事。

蕭穎士

蘭陵蕭穎士，楊府功曹，秩滿南遊，行侶共濟瓜洲。舟中有二少年，熟視穎士，相顧曰：「此人甚有肖於鄱陽忠烈王也。」穎士是鄱陽曾孫，卽自款陳。二子曰：「吾識爾祖久矣。」穎士以廣衆中，未敢詢訪。俟及岸，方將啓請，而二子忽遽負擔而去。穎士必謂非仙則神，虔心嚮矚而已。明年，穎士北歸，止於盱眙邑長之署。方與邑長下簾晝坐，自門遽白云：「某吏於某處，擒獲發塚盜，共五六人。」登令召入，皆反接其手，束縛甚固，旅之于庭，而穎士懸認江中二少年亦縲紲于內，穎士驚曰：「斯二人非仙則神。」因具述曩事。邑長卽令先窮二子，須臾款伏，佐驗明著，皆云：「我之發丘墓，今有年矣。」穎士卽以前說再令詢之。皆曰：「我嘗開鄱陽王冢，大獲金玉。當門有貴人，顏色如生，年方五十，髭鬚斑白，僵卧於石榻，姿狀正與穎士相類，無少差異。我舟中遇子，又知蕭氏，固是鄱陽胤也。因此啓言，我豈有他術哉！」用弱嘗聞人之紹續，其或三五世，

則必一人有肖其祖先之形狀者，斯豈驗歟？

韋宥

元和中，故都尉韋宥出牧温州，忽忽不怡。江波脩永，舟船燠熱。一日晚涼，乃跨馬登岸，依舟而行。忽逢淺沙亂流，蘆葦青翠，因縱轡飲馬。而蘆枝有拂鞭者，宥因閑援熟視，忽見新絲箏絃，周纏蘆心。宥卽拔蘆伸絃，其長倍尋。則試縱之，應手復結。宥奇駭，因置于懷。行次江館，其家室皆已維舟入亭矣。宥故駙馬也，家有妓樂，卽付箏妓曰：「我於蘆心得之，頗甚新緊。然沙洲江徼，是物何自而來，吾甚異之。試施於器，以聽其音。」妓將安之，更無少異，唯短二三寸耳。方饌，妓卽置之赴食，隨置復紉。及食罷就視，則已蜿蜒舒展，選蠕搖動。妓乃驚告，衆來競觀，而雙眸瞭然矣。宥駭曰：「得非龍乎？」遽命衣冠，焚香致敬，盛諸盂水之內，而投於江。纔及中流，風浪皆作，蒸雲走電，咫尺昏晦。俄有白龍長百丈，「一」，掣攫昇天，衆咸觀之，良久乃滅。

「一」「百丈」，《廣記》卷四二二引作「百尺」。

蔡少霞

蔡少霞者，陳留人也。性情恬和，幼而奉道。早歲明經得第，選蘄州參軍。秩滿，漂寓江淮者久之，再授兗州泗水丞。遂於縣東二十里，買山築室，爲終焉之計。居處深僻，俯近龜蒙，水石雲霞，境象殊勝。少霞世累早祛，尤諧夙尚。於一日沿溪獨行，忽得美蔭，因就憩焉。神思昏然，不覺成寐。因爲褐衣鹿幘人之夢中召去，隨之遠遠「一」，乃至城郭處所。碧天虛曠，瑞日瞳矓，人俗潔清，卉木鮮茂。少霞舉目移足，惶惑不寧，卽被導之令前。經歷門堂，深邃莫測。遙見玉人當軒獨立，少霞遽脩敬謁。玉人謂曰：「愍子虔心，今宜領事。」少霞靡知所謂。復爲鹿幘人引至東廊，止於石碑之側，謂少霞曰：「召君書此，賀遇良因。」少霞素不工書，卽極辭讓。鹿幘人曰：「但按文而錄，胡乃拒違！」俄有二青僮，自北而至。一捧牙箱，內有兩幅紫絹文書，一賁筆硯，卽付少霞曰：「法此而寫。」少霞凝神搦管，頃刻而畢。因覽讀之，已記於心矣。題云：「蒼龍溪新宮銘，紫陽真人山玄卿撰。良常西麓，源澤東滙。新宮宏宏，崇軒轍轍。雕珉盤礎「二」，鏤檀竦竦「三」。壁瓦鱗差，瑤階肪截。閣凝瑞霧，樓橫祥霓。騶虞巡徼，昌明捧闥。珠樹規連，玉泉矩洩。靈鷲遐集，聖日俯晰。太上游儲，無極便闕。百神守護，諸真班列。仙翁鵠駕，道師冰潔。飲玉成漿，饌瓊爲屑。桂旗不動，蘭屋互設。妙樂竟臻「四」，流鈴間發。天籟虛徐，風簫冷澈。鳳歌諧律，鶴舞會節。三變玄雲，九成絳闕。易遷虛語，童初浪說。如毀乾坤，自有日月。清寧二百三十一年四月十二日建。」於是少霞方更周視，遂爲鹿幘人促之，忽遽而返，醒然遂寤。

急命紙筆，登卽紀錄。自是兗豫好奇之人，多詣少霞，詢訪其事。有鄭還古者，爲立傳焉。用弱亦常至其居，就求第一本視之，筆迹宛有書石之態。少霞無文，乃孝廉一叟耳，固知其不妄矣。少霞爾後修道尤劇，元和末，已云物故。

〔一〕「遠遠」，《廣記》卷五五作「遠遊」。

〔二〕「珉」原作「玳」，據《廣記》改。

〔三〕「竊」原作「榮」，據《容齋隨筆》卷十三引改。按：《文選·吳都賦》：「雕樂鏤竊。」竊音節，梁也，與「轍」、
「截」等字叶韻。「竦榮」，《廣記》作「棟臬」，亦誤。

〔四〕「竟臻」，《廣記》作「兢奏」。按：「兢」當作「競」。

集異記卷第二

集翠裘

則天時，南海郡獻集翠裘，珍麗異常。張昌宗侍側，則天因以賜之。遂命披裘，供奉雙陸。宰相狄梁公仁傑時入奏事，則天令昇座，因命梁公與昌宗雙陸。梁公拜恩就局。則天曰：「卿二人賭何物？」梁公對曰：「爭先三籌，賭昌宗所衣毛裘。」則天謂曰：「卿以何物爲對？」梁公指所衣紫絕袍曰：「臣以此敵。」則天笑曰：「卿未知此裘價逾千金，卿之所指，爲不等矣。」梁公起曰：「臣此袍乃大臣朝見奏對之衣，昌宗所衣乃嬖倖寵遇之服，對臣之袍，臣猶怏怏。」則天業已處分，遂依其說。而昌宗心赧神沮，氣勢索莫，累局連北。梁公對御就褫其裘，拜恩而出。及至光範門，遂付家奴衣之，乃促馬而去。

王維

王維右丞，年未弱冠，文章得名。性閑音律，妙能琵琶，遊歷諸貴之間，尤爲岐王之所眷重。

時進士張九臯聲稱籍甚。客有出入於公主之門者，爲其致公主邑司牒京兆試官〔一〕，令以九臯爲解頭。維方將應舉，具其事言於岐王，仍求庇借。岐王曰：「貴主之強，不可力爭，吾爲子畫焉。子之舊詩清越者，可錄十篇，琵琶之新聲怨切者，可度一曲，後五日當詣此。」維卽依命，如期而至。岐王謂曰：「子以文士，請謁貴主，何門可見哉！子能如吾之教乎？」維曰：「謹奉命。」岐王則出錦繡衣服，鮮華奇異，遣維衣之。仍令賁琵琶，同至公主之第。岐王入曰：「承貴主出內，故携酒樂奉譙。」卽令張筵，諸伶旅進。維妙年潔白，風姿都美，立於前行，公主顧之，謂岐王曰：「斯何人哉？」答曰：「知音者也。」卽令獨奏新曲，聲調哀切，滿座動容。公主自詢曰：「此曲何名？」維起曰：「號《鬱輪袍》。」公主大奇之。岐王曰：「此生非止音律，至於詞學，無出其右。」公主尤異之，則曰：「子有所爲文乎？」維卽出獻懷中詩卷。公主覽讀，驚駭曰：「皆我素所誦習者，常謂古人佳作，乃子之爲乎？」因令更衣，昇之客右。維風流蘊藉，語言諧戲，大爲諸貴之所欽矚。岐王因曰：「若使京兆今年得此生爲解頭，誠爲國華矣。」公主乃曰：「何不遣其應舉？」岐王曰：「此生不得首薦，義不就試，然已承貴主論托張九臯矣。」公主笑曰：「何預兒事，本爲他人所託。」顧謂維曰：「子誠取解，當爲子力。」維起謙謝。公主則召試官至第，遣宮婢傳教。維遂作解頭，而一舉登第〔二〕。

〔一〕「爲其致公主邑司牒京兆試官」，《廣記》卷一七九引作「爲其地公主以詞牒京兆試官」。

〔二〕《廣記》此下有「矣」。及爲太樂丞，爲伶人舞黃師子，坐出官。黃師子者，非一人不舞也。天寶末，祿山

初陷西京，維及鄭虔、張通等皆處賊庭。洎尅復，俱囚於宣楊里楊國忠舊宅。崔圓因召於私第，令畫數壁。當時皆以圓勳貴無二，望其教解，故運思精巧，頗絕其能。後由此事，皆從寬典，至於貶黜，亦獲善地。今崇義里竇丞相易直私第，卽圓舊宅也，畫尚在焉。維累爲給事中，祿山授以僞官。及賊平，兄縉爲北都副留守，請以己官爵贖之，由是免死。累爲尚書右丞。於藍田置別業，留心釋典焉。」

王渙之

開元中，詩人王昌齡、高適、王渙之齊名。時風塵未偶，而遊處略同。一日天寒微雪，三詩人共詣旗亭，貰酒小飲。忽有梨園伶官十數人，登樓會讌。三詩人因避席隈映，擁爐火以觀焉。俄有妙妓四輩，尋續而至，奢華艷曳，都冶頗極。旋則奏樂，皆當時之名部也。昌齡等私相約曰：「我輩各擅詩名，每不自定其甲乙，今者可以密觀諸伶所謳，若詩人歌詞之多者，則爲優矣。」俄而一伶拊節而唱，乃曰：「寒雨連江夜入吳，平明送客楚山孤。洛陽親友如相問，一片冰心在玉壺。」昌齡則引手畫壁曰：「一絕句。」尋又一伶謳之曰：「開篋淚霑臆，見君前日書。夜臺何寂寞，猶是子雲居。」適則引手畫壁曰：「一絕句。」尋又一伶謳曰：「奉帚平明金殿開，強將團扇共徘徊。玉顏不及寒鴉色，猶帶昭陽日影來。」昌齡則又引手畫壁曰：「二絕句。」渙之自以得名已久，因謂諸人曰：「此輩皆潦倒樂官，所唱皆《巴人》《下俚》之詞耳，豈《陽春》《白雪》之曲，俗物敢近

哉！因指諸妓之中最佳者曰：「待此子所唱，如非我詩，吾卽終身不敢與子爭衡矣。脫是吾詩，子等當須列拜床下，奉吾爲師。」因歡笑而俟之。須臾，次至雙鬟發聲，則曰：「黃沙遠上白雲間，一片孤城萬仞山。羌笛何須怨楊柳，春風不度玉門關。」渙之卽擲飲二子曰：「田舍奴，我豈妄哉？」因大諧笑。諸伶不喻其故，皆起詣曰：「不知諸郎君何此歡噱？」昌齡等因話其事。諸伶競拜曰：「俗眼不識神仙，乞降清重，俯就筵席。」三子從之，飲醉竟日。

張鎰

張相公鎰，大曆中守工部尚書判度支，因奏事稱旨，代宗面許宰相，恩澤獨厚。張公日日以冀，而累旬無耗。忽夜夢有人自門遽入，抗聲曰：「任調拜相。」張驚寤。因思中外初無其人，尋繹不解。有外甥李通禮者，博學善智。張公因召而示之，令研其理。李生沉思良久，因賀曰：「舅作相矣。」張公卽詰之，通禮答曰：「任調反語是饒甜。饒甜無逾甘草，獨爲珍藥。珍藥反語，卽舅名氏也。」張公甚悅。俄有走馬吏報曰：「白麻適下，公拜中書侍郎平章。」

裴通遠

憲宗遷葬于景陵，都城人士畢至。時有前集州司馬裴通遠，家在崇賢里，妻女輩亦以車輿

縱觀於通化門。及歸，日勢已晚，車馳馬驟。自平康北街後，乃有白頭嫗徒步奔走，隨車而來，氣力殆盡。至天門街，夜鼓將動，車馬轉速，嫗亦忙遽而行。車中有老青衣，從四小女，其中或有哀其奔迫者，則問其所居。對曰：「崇賢。」卽謂曰：「與嫗同里，今亦將歸。若步履不逮，懼犯禁，車中尚可通容，能登車至里門否？」其嫗乃荷愧丁寧，因命同載。及至，則珍重辭謝而去。乃於車中遺下小紅錦囊，諸女笑而共開之，中有白羅製爲逝者覆面之物四焉。諸女驚駭，登棄於路。自是不旬日，四女相次而卒。

邢曹進

贈工部尚書邢曹進，至德以來，名爲河朔之健將也。守職魏郡，爲田承嗣所縻。曾因討叛，飛矢中目「一」。左右與之拔箭，而鏃留於骨，微露其末焉。卽以鐵鉗，遣有力者挾而出之，痛毒則極，其鏃堅然不可搖動。曹進痛楚，計無所施。妻孥輩但爲廣脩佛事，用希慈蔭。數日，則又以索縛身於床，復命出之，而特牢如故。曹進呻吟忍耐，俟死而已。忽因晝寢，夢見胡僧入於庭中，曹進則以所苦訴之。胡僧久而謂曰：「能以米汁注於其中，當自愈矣。」及寤，登言於醫工，醫工曰：「米汁卽泔也，豈宜潰瘡哉？」遂令廣詢於人，人莫諭者。明日忽有胡僧詣門丐食，因遽召人。而曹進中堂遙見，乃昨之所夢者矣。卽延之俯近，告以危苦。胡僧曰：「何不灌以寒食餚，

當知其神驗也。」曹進遂悟，錫爲米汁。況所見復肖夢中，則取之，如法以點，應手清涼，頓減酸楚。然既夜，其瘡稍癢，卽令如前繃縛，用力以拔。鉗纔及臉，鏃已突然而出。後傳藥，不旬月而差矣。吁！西方聖人，恩祐顯灼，乃若此之明徵邪！

〔一〕「目」，《廣記》卷一〇一引作「肩」。

韋知微

開元中，士人韋知微者，選授越州蕭山縣令。縣多山魃，變幻百端，無敢犯者。而前後官吏，事之如神，然終遭其害。知微既至，則究其窟宅，廣備薪採，伺候集聚，因環薪縱火，衆持兵刃，焚煞殆盡。而邑中累月，蹤跡枉絕。忽一日晨朝，有客詣縣門，車馬風塵，僕馭憔悴，投刺請謁曰：「蘭陵蕭慥。」知微初不疑慮，卽延入上座。談論笑謔，敏辯無雙。知微甚加顧重，因授館休焉。客乃謂知微曰：「僕途經峽中，收得猴雛，智能可玩，敬以奉貺。」乃出懷中小合開之，而有獼猴，大纔如栗，跳躑宛轉，識解人情。知微奇之，因携入，誇異於宅內。獼猴於是騰躍踴駭，化爲虎焉。扃閉不及，兵仗靡加，知微闔門皆爲啗噬，才遺無有矣。

狄梁公

狄梁公性閑醫藥，尤妙針術。顯慶中，應制入關，路由華州。閭闔之北，稠人廣衆，聚觀如堵。狄梁公引轡遙望，有巨牌大字云：「能療此兒，酬絹千疋。」卽就觀之，有富室兒，年可十四五，卧脾下。鼻端生贅，大如拳石，根蒂綴鼻，纔如食飭。或觸之，酸痛刺骨。於是兩眼爲贅所緹，目睛翻白，痛楚危亟，頃刻將絕。惻然久之，乃曰：「吾能爲也。」其父母泊親屬叩顙祈請，卽輦千縑，置于坐側。公因令扶起，卽於腦後下針寸許，仍詢病者曰：「針氣已達病處乎？」病人頷之。公遽抽針，而疣贅應手而落，雙目登亦如初，曾無病痛。其父母親眷，且泣且拜，則以縑物奉焉。公笑曰：「吾哀爾命之危逼，吾蓋急病行志耳，吾非鬻伎者也。」不顧而去焉。

寧王

寧王方集賓客讌話之際，鬻馬牙人麴神奴者，請呈二馬焉。寧王卽於中堂閱試步驟，毛骨形相，神駿精彩，座客觀之，不相上下。寧王顧問神奴曰：「其價幾何？」牙人先指曰：「此一千緡。」次指曰：「此五百緡。」寧王忻然謂左右曰：「如言付錢，馬送上廐。」賓客莫測其價之懸殊，卽共咨詢。寧王曰：「諸公未喻，當爲驗之。」卽令鞭轡馳驅，往復數四，笑謂座客曰：「辨其優劣否？」皆曰：「不知。」寧王乃顧千貫者曰：「此馬緩急百返，蹄下不起纖埃。」復顧五百緡者曰：「此馬往來十過，足下頗生塵埃。以此等衰其價之高下焉。」座客乃伏。

補編

葉法善

葉法善，字道元，本出南陽葉邑，今居處州松陽縣。四代修道，皆以陰功密行及劾召之術救物濟人。母劉，因晝寐，夢流星入口，吞之乃孕。十五月而生，年七歲，溺於江中，三年不還。父母問其故，曰：「青童引我，飲以雲漿，故少留耳。」亦言青童引朝太上，太上頷而留之。弱冠，身長九尺，額有二午，性淳和潔白，不苟葷辛，常獨處幽室，或遊林澤，或訪雲泉。自仙府歸還，已有役使之術矣。遂人居卯酉山。其門近山，巨石當路，每環迴爲徑以避之。師投符起石，須臾飛去，路乃平坦。衆共驚異。常遊括蒼白馬山，石室內遇三神人，皆錦衣寶冠，謂師曰：「我奉太上命，以密旨告子。子本太極紫微左仙卿，以校錄不勤，謫於人世。速宜立功，濟人佐國，功滿當復舊任。以正一三五之法，令授於子，又勤行助化，宜勉之焉。」言訖而去。自是誅蕩精怪，掃馘凶祲，所在經行，以救人爲志。叔祖靖能，頗有神術，高宗時，入直翰林，爲國子祭酒。武后監國，南遷而終。初，高宗徵師至京，拜上卿，不就。請度爲道士，出入禁內。及欲告成中岳，扈

從者多疾，凡嘔呪，病皆愈。二京受道錄者，文武中外男女子弟千餘人。所得金帛，並修宮觀，卹孤貧，無愛惜。久之，辭歸松陽，經過之地，救人無數。蜀川張尉之妻，死而再生，復爲夫婦。師識之曰：「尸媚之疾也。不速除之，張死矣。」師投符而化爲黑氣焉。相國姚崇已終之女，鍾念彌深，投符起之。錢塘江常有巨蜃，時爲人害，淪溺舟楫，行旅苦之，投符江中，使神人斬之。除害殄凶，玄功遐被，各具本傳。於四海六合，名山洞天，咸所周歷。師年十五，中毒殆死，見青童曰：「天台苗君，飛印相救。」於是獲蘇。又師青城山趙元陽，受遁甲，與嵩陽韋善俊傳八史。東入蒙山，神人授書。詣嵩山，神仙授劍。常行涉大水，忽沉波中，謂已溺死。七日復出，衣履不濡。云：「暫與河伯遊蓬萊。」則天徵至神都，請於諸名岳投奠龍璧。中宗復位，武三思尚秉國權，師以頻察祿祥，保護中宗、相王及玄宗，爲三思所忌，竄於南海。廣州人庶，夙仰其名，北向候之。師乘白鹿，自海上而至，止於龍興新觀。遠近禮敬，捨施豐多，盡修觀宇焉。歲餘，入洪州西山，養神修道。景龍四年辛亥三月九日，括蒼三神人又降，傳太上之命：「汝當輔我睿宗及開元聖帝，未可隱跡山巖，以曠委任。」言訖而去。時二帝未立，而廟號年號，皆以先知。其年八月，果有詔徵入京。迨後平韋后，立相王睿宗，玄宗承祚繼統，師於上京，佐佑聖主，凡吉凶動靜，必預奏聞。會吐蕃遣使進寶函封，曰：「請陛下自開，無令他人知機密。」朝廷默然，唯法善曰：「此是凶函，請陛下勿開，宜令番使自開。」玄宗從之。及令番使自開，函中弩發，中番使死，

果如法善言。俄授銀青光祿大夫、鴻臚卿、越國公、景龍觀主。祖重，精於術數，明於考召，有功於江湖間，謚有道先生，自有傳。父慧明，贈歙州刺史。師請以松陽宅爲觀，賜號淳和，御製碑書額，以榮鄉里。明年正月二十七日，忽有雲鶴數百，行列北來，翔集故山，徘徊三日，瑞雲五色，覆其所居。是歲庚申六月三日甲申，告化於上都景龍觀。弟子既齊物、尹愔，覩真仙下降之事，祕而不言。二十一日，詔贈金紫光祿大夫、越州都督。春秋百有七歲。所居院異香芬郁，仙樂繽紛，有青烟直上燭天，竟日方滅。師請歸葬故鄉，敕度其姪潤州司馬仲容爲道士，與中使監護，葬于松陽。詔衢、婺、括三州助葬，供給所須。發引日，敕官縞衣祖送於國門之外。開元初，正月望夜，玄宗移仗于上陽宮以觀燈，尚方匠毛順心結構綵樓三十餘間，金翠珠玉，間廁其內，樓高百五十尺，微風所觸，鏘然成韻。以燈爲龍、鳳、螭、豹騰躑之狀，似非人力。玄宗見大悅，促召師觀于樓下，人莫知之。師曰：「燈影之盛，固無比矣。然西涼府今夕之燈，亦亞於此。」玄宗曰：「師頃嘗遊乎？」曰：「適自彼來，便蒙急召。」玄宗異其言，曰：「今欲一往得乎？」曰：「此易耳。」於是令玄宗閉目，約曰：「必不得妄視，若誤有所視，必有非常驚駭。」如其言，閉目距躍，已在霄漢，俄而足已及地。曰：「可以觀矣。」既覩影燈，連亘數十里，車馬駢闐，士女紛委，玄宗稱其盛者久之。乃請回，復閉目騰空而上，頃之已在樓下，而歌舞之曲未終。玄宗於涼州以鑲鐵如意質酒，翌日命中使，託以他事使於涼州，因求如意以還，驗之非謬。又嘗因八月望夜，師與

玄宗遊月宮，聆月中天樂，問其曲名，曰《紫雲曲》。玄宗素曉音律，默記其聲，歸傳其音，名之曰《霓裳羽衣》。自月宮還，過潞州城上，俯視城郭悄然，而月光如晝。師因請玄宗以玉笛奏曲。時玉笛在寢殿中，師命人取，頃之而至。奏曲既，投金錢於城中而還。旬日，潞州奏，八月望夜，有天樂臨城，兼獲金錢以進。玄宗累與近臣試師道術，不可殫盡，而所驗顯然，皆非幻妄，故特加禮敬。其餘追岳神、致風雨、烹龍肉、祛妖僞、靈效之事，具在本傳，此不備錄。又燕國公張說嘗詣觀謁，師命酒，說曰：「既無他客。」師曰：「此有麴處士者，久隱山林，性謹而訥，頗耽於酒，鍾石可也。」說請召之，斯須而至。其形不及三尺，而腰帶數圍，使坐于下。拜揖之禮，頗亦魯朴。酒至，杯盃皆盡，而神色不動。燕公將去，師忽奮劍叱麴生曰：「曾無高談廣論，唯沉湎於酒，亦何用哉！」因斬之，乃巨榼而已。嘗謂門人曰：「百六十年後，當有術過我者，來居卯酉山矣。」初，師居四明之下，在天台之東，數年，忽於五月一日，有老叟詣門，號泣求救。門人謂其有疾也，師引而問之，曰：「某東海龍也，天帝所敕，主八海之寶，一千年一更其任，無過者超證仙品。某已九百七十年矣，微績垂成，有婆羅門逞其幻法，住於海峰，晝夜禁呪，積三十年矣，其法將成，海水如雲，卷在天半，五月五日，海將竭矣。統天鎮海之寶，上帝制靈之物，必爲幻僧所取。五日中午時，乞賜丹符垂救。」至期，師敕丹符飛往救之，海水復舊，其僧愧恨，赴海而死。明日，龍輦寶貨珍奇以來報。師拒曰：「林野之中，棲神之所，不以珠璣寶貨爲用。」一無所受。因謂龍曰：「此

厓石之上，去水且遠，但致一清泉，卽爲惠也。是夕聞風雨之聲。及明，繞山麓四面，成一道石渠，泉水流注，經冬不竭。至今謂之天師渠。又一說云：顯慶中，法善奉命修黃籙齋于天台山，道由廣陵，明晨將濟瓜州。是日，江干渡人，艤舟而候。時方春暮，浦溆晴暖，忽有黃白二叟相謂曰：「乘間可以圍棋爲適乎？」卽嚮空召冥兒，俄有卅童擘波而出，衣無沾濕。一叟曰：「挈棋局與席偕來。」須臾，卅童如命設席沙上，對坐，約曰：「賭勝者食明日北來道士。」因大笑而下子。良久，白衣叟曰：「卿北矣，幸無以味美見侵也。」曠望逡巡，徐步凌波，遠遠而沒。舟人知其將害法善也，惶惑不寧。及旦，則有內官馳馬前至，督備舟楫。舟人則以昨日之所見具列焉。內官驚駭不悅。法善尋續而來，內官復以舟人之辭以啓法善。法善微哂曰：「有是乎？幸無掛意。」時法善符術神驗，賢愚共知，然內官泊舟人從行之輩，憂軫靡遑。法善知之而促解纜，發岸咫尺，而暴風狂浪，天日昏晦。舟中之人，相顧失色。法善徐謂侍者曰：「取我黑符投之鵠首。」既投而波流靜謐。有頃既濟，法善顧舟人曰：「爾可廣召宗侶。沿流十里之間，或蘆洲蒹渚，有巨鱗在焉。爾可取之，當大獲其資矣。」舟人承教，不數里，果有白魚，長百尺許，周三十餘圍，殭暴沙上。就而視，腦有穴嵌然流膏。舟人因斲割載歸，左近村閭，食魚累月。《廣記》卷二六

按：《廣記》原注：出《集異記》及《仙傳拾遺》。

王四郎

洛陽尉王琚，有孽姪小名四郎，孩提之歲，其母他適，因隨去。自後或十年五年至琚家，而王氏不復錄矣。唐元和中，琚因常調，自鄭入京，道出東都，方過天津橋，四郎忽於馬前跪拜，布衣草履，形貌山野。琚不識，因自言其名，琚哀愍久之。乃曰：「叔今赴選，費用固多，少物奉獻，以助其費。」卽於懷中出金，可五兩許，色如雞冠。因曰：「此不可與常者等價也，到京但於金市訪張蓬子付之，當得二百千。」琚異之，卽謂曰：「爾頃在何處？今復何適？」對曰：「向居王屋山下洞，今將往峨嵋山，知叔到此，故候拜覲。」琚又曰：「爾今停泊在何處？」對曰：「中橋逆旅席氏之家。」時方小雨，會琚不賫雨衣，遽去，曰：「吾卽至爾居。」四郎又拜曰：「行李有期，恐不獲祇候。」琚逕歸，易服而往，則已行矣。因詢之席氏，乃曰：「妻妾四五人，皆有殊色，至於衣服鞍馬，華修非常。其王處士肩輿先行，云往劍南。」琚私奇之，然未信也。及至上都，時物翔貴，財用頗乏。因謂家奴吉兒曰：「爾將四郎所留者一訪之。」果有張蓬子，乃出金示之，蓬子驚喜，捧而叩顙，曰：「從何得此！所要幾緡？」吉兒卽曰：「二百千耳。」蓬子遂置酒食宴吉兒，卽依請而付。又曰：「若更有，可以再來。」吉兒以錢歸，琚大異之。明日自詣蓬子。蓬子曰：「此王四郎所貨化金也。西域商胡專此伺買，且無定價，但四郎本約多少耳，逾則不必受也。」琚遂更不取焉。自後留心

訪問，冀一會遇，終不復見之。《廣記》卷三五

李清

李清，北海人也，代傳染業。清少學道，多延齊魯之術士道流，必誠敬接奉之，終無所遇，而勤求之意彌切。家富於財，素爲州里之豪賾。子孫及內外姻族，近百數家，皆能遊手射利於益都。每清生日，則爭先餽遺，凡積百餘萬。清性仁儉，來則不拒，納亦不散，如此相因，填累藏舍。年六十九，生日前一旬，忽召姻族，大陳酒食。已而謂曰：「吾賴爾輩勤力無過，各能生活，以是吾獲優贍。然吾布衣蔬食，逾三十年矣，寧復有意於華侈哉！爾輩以吾老長行，每餽吾生日衣裝玩具，侈亦至矣。然吾自以久所得，緘之一室，曾未閱視，徒損爾之給用，資吾之糞土，竟何爲哉！幸天未錄吾魂氣，行將又及吾之生辰，吾固知爾輩又營續壽之禮，吾所以先期而會，蓋止爾之常態耳。」子孫皆曰：「續壽自遠有之，非此將何以展卑下孝敬之心？願無止絕，俾姻故之不安也。」清曰：「苟爾輩志不可奪，則從吾所欲而致之，可乎？」皆曰：「願聞尊旨。」清曰：「各能遺吾洪纖麻縻百尺，總而計之，是吾獲數千百丈矣，以此爲紹續吾壽，豈不延長哉！」皆曰：「謹奉教。然尊旨必有所以，卑小敢問。」清笑謂曰：「終亦須令爾輩知之，吾下界俗人，妄意求道，精神心力，夙夜勤勞，于今六十載矣，而曾無影響。吾年已老耄，朽蠹殆盡，自期筋骸不過三二年耳，

欲乘視聽步履之尚能，將行早志，爾輩幸無吾阻。」先是，青州南十里有高山，俯壓郡城，峰頂中裂，豁爲闢崖。州人家坐對嵐岫，歸雲過鳥，歷歷盡見。按圖經云雲門山，俗亦謂之劈山。而清蓄意多時，及是謂姻族曰：「雲門山，神仙之窟宅也，吾將往焉。吾生日坐大竹簣，以輓轡自縊而下，以纖縻爲媒焉。脫不可前，吾當急引其媒，爾則出吾於媒末。設有所遇，而能肆吾志，亦當復來歸。」子孫姻族泣諫曰：「冥冥深遠，不測紀極。況山精木魅，蛇虺怪物，何類不儲，忍以千金之身，自投於斯，豈久視永年之階乎？」清曰：「吾志也。汝輩必阻，則吾私行矣，是不獲行簣洪縻之安也。」衆知不可迴，則共治其事。及期而姻族鄉里凡千百人，競齋酒饌，遲明大會於山椒。清乃揮手辭謝而入焉。良久及地，其中極暗，仰視天纔如手掌。捫四壁，止容兩席許。東南有穴，可俯僂而入，乃棄簣遊焉。初甚狹細，前往則可伸腰，如此約行三十里，晃朗微明。俄及洞口，山川景象，雲烟草樹，宛非人世。曠望久之，惟東南十數里，隱映若有居人焉。因徐步詣之，至則陡絕一臺，基級極峻，而南向可以登陟。遂虔誠而上，頗懷恐懼。及至，闕其堂宇甚嚴，中有道士四五人，清於是扣門，俄有青童應門問焉，答曰：「青州染工李清。」青童如詞以報，清聞中堂曰：「李清伊來也。」乃令前。清惶怖趨拜，當軒一人遙語曰：「未宜來，何卽遽至？」因令遍拜諸賢。其時日已午，忽有白髮翁自門而入，禮謁，啟曰：「蓬萊霞明觀丁尊師新到，衆聖令邀諸真登上清赴會。」於是列真偕行。謂清曰：「汝且居此。」臨出顧曰：「慎無開北扉。」清巡視院

字，兼啟東西門，情意飄飄然，自謂永棲真境。因至堂北，見北戶斜掩，偶出顧望，下爲青州，宛然在目。離思歸心，良久方已。悔恨思返，諸真則已還矣。其中相謂曰：「令其勿犯北門，竟爾自惑，信知仙界不可妄至也。」因與瓶中酒一甌，其色濃白。既而謂曰：「汝可且歸。」清則叩頭求哀。又云：「無路却返。」衆謂清曰：「會當至此，但時限未耳。汝無苦無途，但閉目，足至地則到鄉也。」清不得已，流涕辭行。或相謂曰：「既遣其歸，須令有以爲生。」清心恃豪富，訝此語爲不知己。一人顧清曰：「汝於堂內閣上，取一軸書去。」清既得，謂清曰：「脫歸無倚，可以此書自給。」清遂閉目，覺身如飛鳥，但聞風水之聲相激，須臾履地，開目卽青州之南門。而其時纔申末，城隍阡陌，髣髴如舊。至於屋室樹木，人民服用，已盡變改。獨行盡日，更無一人相識者。卽詣故居，朝來之大宅宏門，改張新舊，曾無倣像。左側有業染者，因投詣與之語，其人稱姓李。自云：「我本北海富家。」因指前後閭閻，「此皆我祖先之故業。曾聞先祖於隋開皇四年生日，自縊南山，不知所終，因是家道淪破。」清悵怏久之，乃換姓氏，寓遊城邑。因取所得書閱之，則療小兒諸疾方也。其年青州小兒癘疫，清之所醫，無不立愈。不旬月財產復振。時高宗永徽元年，天下富庶，而北海往往有知清者。因是齊魯人從而學道術者，凡百千輩。至五年，乃謝門徒云：「吾往泰山觀封禪。」自此莫知所往。《廣記》卷三六

玉女

唐開元中，華山雲臺觀，有婢玉女，年四十五，大疾，徧身潰爛臭穢。觀中人懼其污染，卽共送于山澗幽僻之處。玉女痛楚呻吟，忽有道士過前，遙擲青草三四株，其草如菜，謂之曰：「勉食此，不久當愈。」玉女卽茹之，自是疾漸痊，不旬日復舊。初忘飲食，惟恣游覽。但意中飄飄，不喜人間，及觀之前後左右亦不願過。此觀中人謂其消散久矣，亦無復有訪之者。玉女周旋山中，酌泉水，食木實而已。後於巖下，忽逢前道士謂曰：「汝疾既瘥，不用更在人間。雲臺觀西二里有石池，汝可日至辰時，投以小石，當有水芝一本自出，汝可掇之而食，久久當自有益。」玉女卽依其教，自後筋骸輕健，翱翔自若，雖屢爲觀中人逢見，亦不知爲玉女耳。如此數十年，髮長六七尺，體生綠毛，面如白花。往往山中之人過之，則叩頭遙禮而已。大曆中，有書生班行達者，性氣粗疎，誹毀釋道，爲學於觀西序。而玉女日日往來石池，因以爲常。行達伺候窺覘，又熟見投石採芝，時節有准。於一日稍先至池上，及其玉女投小石，水芝果出。行達乃奪取。玉女遠在山巖，或棲樹杪，既任採去，則呼歎而還。明日，行達復如此。積旬之外，玉女稍稍與行達爭先，步武相接，歛然遽捉其髮，而玉女騰去不得。因以勇力挈其膚體，仍加逼迫。玉女號呼求救，誓死不從，而氣力困憊，終爲行達所辱。扃之一室，翌日行達就觀，乃見皤然一媼，疰瘵異

常，起止殊艱，視聽甚昧。行達驚異，遽召觀中人，細話其事。卽共同問玉女，玉女備述始終。觀中人固有聞知其故者，計其年蓋百有餘矣。衆哀之，因共放去，不經月而歿。《廣記》卷六三

趙操

趙操者，唐相國憬之孽子也。性疎狂不愼，相國屢加教戒，終莫改悔。有過懼罪，因盜小吏之驢，攜私錢二緡，竄於旗亭下。不日錢盡，遂南出啓夏門，恣意縱驢，從其所往。俄屆南山，漸入深遠，猿鳥一徑，非畜乘所歷。操卽繫驢山木，躋攀獨往。行可二十里，忽遇人居，因卽款門。既入，有二白髮叟，謂操曰：「汝既至，可以少留。」操顧其室內，妻妾孤幼，不異俗世。操端無所執，但恣遊山水，而甚安焉。月餘，二叟謂操曰：「勞汝入都，爲吾市山中所要。」操則應命。二叟曰：「汝所乘驢，貨之可得五千，汝用此，依吾所約，買之而還。」操因曰：「操大人方爲國相，今者入京，懼其收維。且驢非己畜，何容便貨。況繫之山門，今已一月，其存亡不可知也。」二叟曰：「第依吾教，勿過憂苦。」操卽出山，宛見其驢尚在，還乘之而馳，足力甚壯。貨之，果得五千。因探懷中二叟所示之書，惟買水銀耳。操卽爲交易，薄晚而歸，終暝遂及二叟之舍。二叟卽以雜藥燒煉，俄而化爲黃金。因以此術示之於操。自爾半年，二叟徐謂操曰：「汝可歸寧，三年之後，當與汝會於茅廬。」操願留不獲，于是辭訣。及家，相國薨再宿矣。操過小祥，則又入山，歧

路木石，峯巒樹木，皆非向之所經也。操亟返，服闋，因告別昆弟，遊於江湖。至今無羈於世，從學道者甚衆，操終無傳焉。《廣記》卷七三

符契元

唐上都昊天觀道士符契元，閩人也。德行法術，爲時所重。長慶初，中夏，晨告門人曰：「吾習靜片時，慎無喧動。」乃扃戶晝寢。既而道流四人，邀延出門，心欲有詣，身卽輒至。離鄉三十餘年，因思一到。俄造其居，室宇摧落，園圃荒蕪，舊識故人，孑遺殆盡。時果未熟，乃有隣里小兒，攀緣採摘，契元護惜，咄叱曾無應者，契元愈怒。傍道流止之曰：「熟與未熟，同歸摘拾，何苦掛意也。」又曾居條山鍊藥，乃亦思一遊，忽已至矣。恣意歷覽，遍窮巖谷。道流曰：「日色晚，可歸矣。」因同行入京。道上忽逢鳴騶，導引甚盛，契元遽卽避路。道流曰：「陽官不宜避陰官，但遵路而行。」須臾，前導數輩，望契元卽狼狽奔迸。及官至，諦視之，乃僕射馬總，時方爲刑部尚書，素善契元。馬亦無恙，與契元晤，心獨異之，日已夕矣。遲明卽詣開化坊訪馬，而與兵部韓侍郎對弈，因留連竟日，而旁察辭氣神色，曾無少異，私怪其故。有頃，聞中疾，不旬日而歿。又給事李忠敏云：「此是陶天活，有道術者，中朝奉道者多歸之。天活本安南人，非閩人也。能于入靜日，多神遊諸岳。馬公事人皆知之。」

〔一〕《廣記》卷七八引作「集異」，疑卽《集異記》。

茅安道

唐茅安道，廬山道士，能書符役鬼，幻化無端。從學者常數百人。曾授二弟子以隱形洞視之術。有頃，二子皆以歸養爲請。安道遣之，仍謂曰：「吾術傳示，盡資爾學道之用，卽不得盜情而銜其術也。苟違吾教，吾能令爾之術臨事不驗耳。」二子授命而去。時韓晉公滉在潤州，深嫉此輩。二子徑往修謁，意者脫爲晉公不禮，卽當遁形而去。及召入，不敬，二子因弛慢縱誕，攝衣登階。韓大怒，卽命吏卒縛之。於是二子乃行其術，而法果無驗，皆被擒縛。將加誅戮，二子曰：「我初不敢若是，蓋師之見誤也。」韓將併絕其源，卽謂曰：「爾但致爾師之姓名居處，吾或釋汝之死。」二子方欲陳述，而安道已在門矣。卒報公，公大喜，謂得悉加戮焉，遽令召入。安道龐眉美髯，姿狀高古。公望見，不覺離席，延之對坐。安道曰：「聞弟子二人愚騃，干冒尊嚴，今者命之短長，懸於指顧，然我請詰而愧之，然後俟公之行刑也。」公卽臨以兵刀，械繫甚堅，召至階下。二子叩頭求哀，安道語公之左右曰：「請水一器。」公恐其得水遁術，固不與之。安道欣然，遽就公之硯水飲之，而嘆二子，當時化爲雙黑鼠，亂走於庭前。安道奮迅，忽變爲巨鳶，每足攫一鼠，冲飛而去。晉公驚駭良久，終無奈何。

《廣記》卷七八

石旻

唐石旻有奇術，在揚州，段成式數年不隔旬必與之相見。至開成初，在城親故間，往往說石旻術不可測。盛傳寶曆中，石隨尚書錢徽至湖州學院，子弟皆在。時暑月，獵者進一兔，錢命作湯。方共食，旻笑曰：「可留兔皮，聊志一事。」遂釘皮於地，壘壑塗之，上朱書一符，獨言曰：「恨校遲。恨校遲。」錢氏兄弟詰之，石曰：「欲共請君共記卯年也。」至太和九年，錢可復鳳翔遇害，歲在乙卯也。《廣記》卷七八

按：本條亦見《酉陽雜俎》卷五。

李子牟

李子牟者，唐蔡王第七子也，風儀爽秀，才調高雅，性閑音律，尤善吹笛，天下莫比其能。江陵舊俗，孟春望夕，尚列影燈。其時士女緣江，駢闐縱觀。子牟客遊荆門，適逢其會，因謂朋從曰：「吾吹笛一曲，能令萬衆寂爾無譁。」於是同遊贊成其事，子牟即登樓，臨軒迴奏，清聲一發，百戲皆停，行人駐愁，坐者起聽。曲罷良久，衆聲復喧。而子牟恃能，意氣自若。忽有白叟，自樓下小舟行吟而至，狀貌古峭，辭韻清越。子牟泊坐客爭前致敬。叟謂子牟曰：「向者吹

笛，豈非王孫乎？天格絕高，惜者樂器常常耳。」子牟則曰：「僕之此笛，乃先帝所賜也。神鬼異物，則僕不知；音樂之中，此爲至寶。平生視僅過萬數，方僕所有，皆莫之比〔二〕，而叟以爲常常，豈有說乎？」叟曰：「吾少而習焉，老猶未倦。如君所有，非吾敢知。王孫以爲不然，當爲一試。」子牟以授之，而叟引氣發聲，聲成而笛裂。四座駭愕，莫測其人。子牟因叩顙求哀，希逢珍異。叟對曰：「吾之所貯，君莫能吹。」卽令小僮，自舟齎至。子牟就視，乃白玉耳。叟付子牟，令其發調，氣力殆盡，纖響無聞。子牟彌不自寧，虔恭備極。叟乃授之微弄，座客心骨冷然。叟曰：「吾慙子志尚，試爲一奏。」清音激越，遐韻泛溢，五音六律，所不能偕。曲未終，風濤噴騰，雲雨昏晦。少頃開霽，則不知叟之所在矣。《廣記》卷八二

〔二〕之比「原作」能知，據明鈔本《廣記》改。

奚樂山

上都通化門長店，多是車工之所居也。廣備其財，募人集車，輪轅輻輳，皆有定價。每治片輞，通鑿三竅，懸錢百文，雖敏手健力器用利銳者，日止一二而已。有奚樂山者，攜持斧鑿，詣門自售，視操度繩墨頗精，徐謂主人：「幸分別輞材，某當併力。」主人訝其貪功，笑指一室曰：「此有六百斤，可任意施爲。」樂山曰：「或欲通宵，請具燈燭。」主人謂其連夜，當倍常功，固不能多辦。

矣，所請皆依。樂山乃閉戶屏人，丁丁不輟。及曉，啟主人曰：「並已畢矣，願受六十緡而去也。」主人泊鄰里大奇之，則視所爲精妙，錙銖無失。衆共驚駭，卽付其錢。樂山謝辭而去。主人密候所之，其時嚴雪累日，都下薪米翔貴，樂山遂以所得，遍散與寒乞貧窶不能自振之徒，俄頃而盡。遂南出都城，不復得而見矣。《廣記》卷八四

阿足師

阿足師者，莫知其所來。形質癡濁，神情不慧，時有所言，靡不先覺。居雖無定，多寓閭鄉。憧憧往來，爭路禮謁。山嶽檀施，曾不顧瞻。人或憂或疾，獲其指南者，其驗神速。時陝州有富室張臻者，財積鉅萬，止有一男，年可十七，生而愚騃，既孿手足，復懵語言，惟嗜飲食，口如溪壑。父母鍾愛，盡力事之，迎醫求藥，不遠千里。十數年後，家業殆盡。或有謂曰：「阿足賢聖，見世諸佛，何不投告，希其痊除。」臻與其妻，來抵閭鄉，叩頭拭淚，求其拯濟。阿足久之謂臻曰：「汝冤未散，尚須十年，愍汝勤虔，爲汝除去。」卽令選日，於河上致齋，廣召衆多，同觀度脫。仍令齋致其男，亦赴道場。時衆謂神通，而觀者如堵。跂竦之際，阿足則指壯力者三四人，扶拽其人，投之河流。臻泊舉會之人，莫測其爲。阿足顧謂臻曰：「爲汝除災矣。」久之，其子忽於下流十數步外，立於水面，戟手於其父母曰：「與汝冤仇，宿世緣業，賴逢聖者，遽此解揮。儻或不然，

未有畢日。」挺身高呼，都不愚癡。須臾沉水，不知所適。《廣記》卷九七

殭僧

唐元和十三年，鄭滑節度使司空薛公平、陳許節度使李公光顏，並准詔各就統所部兵，自衛入討東平。抵濮陽南七里，駐軍焉。居人盡散，而村內有窄堵波者，中有殭僧，瞪目而坐，佛衣在身，以物觸之，登時塵散，衆爭集視，填咽累日。有許卒郝義曰：「焉有此事！」因以刀刺其心，如根上壤。義下塔不三四步，捧心大叫一聲而絕。李公遂令標莖其事，瘞於其下。明日陳卒毛清曰：「豈有此乎！昨者郝義因偶會耳。」卽以刀環築去二齒。清下塔不三四步，捧頤大叫一聲而絕。李公又令標莖其事，瘞於其下。自是無敢犯者，而軍人祈福乞靈，香火大集，往環三四里，人稠不得入焉。軍人以錢帛衣裝檀施，環一二里而滿焉。司空薛公，因令軍卒之戰傷瘡重者，許其落籍。居不旬日，則又從軍東入，而所聚之財，爲盜賊挈去，則無怪矣。至今刀瘡齒缺，分明猶在。《廣記》卷一〇一

王安國

涇之北鄙，農人有王安國者，力穡，衣食自給。唐寶曆三年冬，夜有二盜踰牆而入，皆執利

刃。安國不敢支梧，而室內衣裘，挈之無孑遺。安國一子名何七，年甫六七歲，方眠驚起，因叫有賊，登時爲賊射，應弦而斃。安國間外有二驢紫色者，亦爲攘去。遲明，村人集聚，共商量捕逐之路。俄而何七之魂，登房門而號：「我死自是命，那復多痛，所痛者永訣父孃耳。」遂冤泣久之。鄰人會者五六十人皆爲雪涕。因曰：「勿謀追逐，明年五月當自送死。」乃召安國，附耳告之名氏，仍期勿「」。泊麥秋。安國有麥半頃，方收拾，晨有二牛來，蹊踐狼籍。安國牽歸，遍謂里中曰：「誰牛傷暴我苗，我已繫之。牛主當齎償以購，不爾，吾將詣官焉。」里中共往，皆曰：「此非左側人之素畜者。」聚視久之，忽有二客至，曰：「我牛也，昨暮驚逃，不虞至此。所損之田，請酬倍資而歸我畜焉。」共里人詰所從，因驗契書，其一乃以紫驢交致也。安國卽醒何七所謂，及詢名姓皆同，遂縛之，曰：「爾卽去冬射我子盡我財者。」二盜相顧不復隱，曰：「天也！命也！死不可追也。」卽述其故，曰：「我既行劫殺，遂北竄寧慶之郊，謂事已積久，因買牛將歸岐上。昨牛抵村北二十里，徘徊不進，俟夜黑方將過此。既寐，夢一小兒五歲許，裸形亂舞，紛紜相迷，經宿方寤。及覺，一牛之縻糾不斷，如被解脫，則已竄矣。因蹤跡之，由徑來至此。去冬之寇，鉅敢逃焉。」里人送邑，皆准於法。《廣記》卷二二八

「」勿「下疑脫「洩」字。

汪鳳

唐蘇州吳縣毗汪鳳，宅在通津，往往怪異起焉。不十數年，鳳之妻子泊僕使輩，死喪略盡。鳳居不安，因貨之同邑盛忠。忠居未五六歲，其親戚凋隕，又復無幾。忠大憂懼，則損其價而標貨焉。吳人皆知其故，久不能售。邑胥張勵者，家富於財，羣從彊大，爲邑中之蠹橫，居與忠同里，每旦詣曹，路經其門，則遙見二青氣，粗如箭筈，而繁銳徹天焉。勵謂寶玉之藏在下，而精氣上騰也，不以告人，日日視之。因詣忠，請以百緡而交關焉。尋徙入，復晨望其氣不衰。於是大具畚鍤，發其氣之所萌也。掘地不六七尺，遇盤石焉。去其石，則有石櫃，雕鐫製造，工巧極精。仍以鐵索周匝束縛，皆用鐵汁固縫，重以石灰密封之。每面各有朱記七窠，文若謬篆，而又屈曲勾連，不可知識。勵卽加鉗鎚，極力開拆。石櫃既啟，有銅釜可容一斛，釜口銅盤覆焉，用鉛錫錮護。仍以紫印九窠，廻旋印之。而印文不類前體，而全如古篆，人無解者。勵拆去銅盤，而釜口以緋繒三重羃之。勵纔揭起，忽有大猴跳而出。衆各驚駭，無敢近者。久之，超踰而莫知所詣。勵因視釜中，乃有石銘云：「禎明元年七月十五日，茅山道士鮑知遠，囚猴神於此。其有發者，發後十一年，胡兵大擾，六合煙塵，而發者俄亦族滅。」禎明卽陳後主叔寶年號也。勵以天寶二年十月發，至十四年冬，祿山起戎。自是周年，勵家滅矣。《廣記》卷一四〇

賈人妻

唐餘干縣尉王立調選，傭居大寧里。文書有誤，爲主司駁放，資財蕩盡，僕馬喪失，窮悴頗甚。每丐食於佛祠，徒行晚歸，偶與美婦人同路，或前或後依隨。因誠意與言，氣甚相得。立因邀至其居，情款甚洽。翌日謂立曰：「公之生涯，何其困哉！妾居崇仁里，資用稍備，儻能從居乎？」立既悅其人，又幸其給，卽曰：「僕之厄塞，阂於溝瀆。如此勤勤，所不敢望焉。子又何以營生？」對曰：「妾素賈人之妻也，夫亡十年，旗亭之內，尚有舊業，朝肆暮家，日贏錢三百，則可支矣。公授官之期尚未，出遊之資且無，脫不見鄙，但同處以須冬集可矣。」立遂就焉。閱其家，豐儉得所，至於扃鑰之具，悉以付立。每出，則必先營辦立之一日饌焉。及歸，則又攜米肉錢帛以付立，日未嘗闕。立憫其勤勞，因令傭買僕隸，婦託以他事拒之，立不之彊也。周歲產一子，唯日中再歸爲乳耳。凡與立居二載。忽一日夜歸，意態遑遑，謂立曰：「妾有冤仇，痛纏肌骨，爲日深矣。伺便復仇，今乃得志，便須離京，公其努力。此居處五百緡自置，契書在屏風中。室內資儲，一以相奉。嬰兒不能將去，亦公之子也，公其念之。」言訖，收淚而別。立不可留止，則視其所攜皮囊，乃人首耳。立甚驚愕，其人笑曰：「無多疑慮，事不相縈。」遂挈囊踰垣而去，身如飛鳥。立開門出送，則已不及矣。方徘徊於庭，遽聞却至。立迎門接俟，則曰：「更乳嬰兒，以豁離

恨。」就撫子，俄而復去，揮手而已。立迴燈褰帳，小兒身首已離矣。立惶駭，達旦不寐，則以財帛買僕乘，遊抵近邑，以伺其事。久之，竟無所聞。其年立得官，卽貨鬻所居歸任，爾後終莫知其音問也。《廣記》卷一九六

魏淑

大曆中，元察爲邛州刺史。而州城將有魏淑者，膚體洪壯，年方四十，親老妻少，而忽中異疾，無所酸苦，但飲食日損，身體日銷耳。醫生術士，拱手無措。寒暑未周，卽如嬰孩焉，不復能行坐語言。其母與妻，更相提抱。遇淑之生日，家人召僧致齋，其妻乃以釵股挾之以哺，須臾能盡一小甌。自是日加所食，身亦漸長，不半歲，乃復其初。察則授與故職，趨驅氣力，且無少異。後十餘年，捍蠻戰死于陳。《廣記》卷二二〇

李欽瑤

天寶末，有騎將李欽瑤者，弓矢絕倫，以勞累官至郡守，兼御史大夫。至德中，隸臨淮，與史思明相持於陝西。晨朝合戰，臨淮布陣徐進，去敵尚十許里，忽有一狐起於軍前，踉蹌而趨，若導引者。臨淮不懌曰：「越王軾怒蛙，蓋激勵官軍士耳，狐乃持疑妖邪之物，豈有前陣哉！」卽付

欽瑤以三矢，令取狐焉。欽瑤受命而馳，適有淺蕪三二十畝，狐奔入其中，欽瑤逐之。歟有野雉驚起馬足，徑入雲霄，欽瑤翻身仰射，一發而墜。然後鳴鞭逐狐，十步之內，拾矢又中。於是攜二物以復命焉。舉軍懽呼，聲振山谷。時回鶻列騎置陣於北原，其首領僅一二百輩，棄軍飛馬而來，爭捧欽瑤，似爲神異。仍謂曰：「爾非回鶻之甥。不然，何能弧矢之妙，乃得如此哉！」《廣記》

卷三三七

高元裕

襄陽節度使高元裕，大和三年任司勳員外郎，寓宿南宮。晝夢有人告曰：「十年作襄刺史。」既寤，髣髴儀質，蓋偉秀士也。私異之，因援毫以隱語記於廳之東楹掩映之處，曰：「大三寤襄刺十年。」洎開成三年，爲御史中丞，雖渝前夢，遂謂夢固虛耳。是後出入中外，揚歷貴位，清望碩德，冠冕時流，海內傾注，佇升鼎鉉，視刺襄乃優賢之舉耳。大中二年，由天官尚書，授鉞漢南，去前夢二十一年矣。公謂楹上之字，無復存也，因話其事於都官韋。好奇之士，往詣求焉。自公題記後，廨署補葺亦屢矣，而毫翰煥然獨存。非神靈扶持，而明徵於今日耶！公因屈指，以今之年，加曩之十，乃二十年矣。何陰隲之顯晦微婉，及期而朗悟之如此哉！」《廣記》卷二七八

衛庭訓

衛庭訓，河南人。累舉不第，天寶初，乃以琴酒爲事，凡飲皆敬酬之。恒遊東市，遇友人飲於酒肆。一日偶值一舉人，相得甚歡，乃邀與之飲。庭訓復酌，此人昏然而醉。庭訓曰：「君未飲何醉也？」曰：「吾非人，乃華原梓桐神也。昨日從酒肆過，已醉君之酒，故今日訪君。適醉者，亦感君之志。今當歸廟。他日有所不及，宜相訪也。」言訖而去。後旬日乃訪之，至廟，神已令二使迎庭訓入廟。庭訓欲拜，神曰：「某年少，請爲弟。」神遂拜庭訓爲兄。爲設酒食歌舞，既夕而歸。來日復詣，告之以貧。神顧謂左右，看華原縣下有富人命衰者，可收生魂來。鬼徧索之，其縣令妻韋氏衰，乃收其魂，掩其心。韋氏忽心痛殆絕。神謂庭訓曰：「可往得二百千與療。」庭訓乃歸主人，自署云：「解醫心痛。」令召之，庭訓入神教，求二百千，令許之。庭訓投藥，卽愈如故。兒女忻忭，令亦喜，奉錢留宴飲。自爾無日不醉。主人諭之曰：「君當隱貧窘，何苦使用不節乎？」庭訓曰：「但有梓桐神在，何苦貧也。」主人以告令，令召問之，具以實告。令怒，逐庭訓而焚梓桐神廟。庭訓夜宿村店，忽見梓桐神來曰：「非兄之過，乃弟合衰。弟今往濯錦江立廟，極盛於此，可詣彼也。」言訖不見。庭訓又往濯錦江，果見新廟。神見夢於鄉人，可請衛秀才爲廟祝。明日鄉人請留之。歲暮，神謂庭訓曰：「吾將至天曹，爲兄問祿壽。」去數日歸，謂庭訓曰：

「兄來歲合成名，官至涇陽主簿，秩不滿，有人迎充判官。」於是神置酒餞之。至京，明年果成名，釋褐授涇陽縣主簿。在任二載，分務閒暇，獨立廳事，有一黃衫吏，持書而入，拜曰：「天曹奉命爲判官。」遂卒於是夕。《廣記》卷三〇二

崔圓

天寶末，崔圓在益州。暮春上巳，與賓客將校數十百人，具舟楫遊於江。都人縱觀如堵。是日風色恬和，波流靜謐。初宴作樂，賓從肅如。忽聞下流十數里，絲竹競奏，笑語喧然，風水薄送如咫尺。須臾漸近，樓船百艘，塞江而至，皆以錦繡爲帆，金玉飾舟，旄纛蓋傘，旌旗戈戟，繽紛照耀。中有朱紫十數人，綺羅妓女凡百許，飲酒奏樂方酣。他舟則列從官武士五六千人，持兵戒嚴，泝沿中流，良久而過。圓卽令訪問，隨行數里，近舟，舟中方言曰：「天子將幸巴劍，蜀中諸望神祇，遷移避駕，幸無深怪。」圓駭愕，因罷會。時朝廷無事，自此先爲其備。明歲南狩，圓應卒無闕矣。《廣記》卷三〇三

張光晟

賊臣張光晟，其本甚微，而有才用，性落拓嗜酒。壯年爲潼關卒，屢被主將鞭笞。因奉役至

華州，盛暑驅馳，心不平，過嶽祠，遂脫衣買酒，致奠金天王，朗言曰：「張光晟身負才器，未遇知己，富貴貧賤，不能自料，惟神聰鑒，當賜誠告。」祀訖，因極飲大醉，晝寢于碑堂。忽夢傳聲云：「喚張光晟。」迫蹙甚急，卽入一府署，嚴邃異常。導者云：「張光晟到。」拜跪訖，遙見當廳貴人，有如王者，謂之曰：「欲知官祿，但光晟拜相，則天下太平。」言訖驚寤，冷汗，獨怪之。後頻立戰功，積勞官至司農卿。及建中德宗西狩，光晟奔從，已至開遠門，忽謂同行朝官曰：「今日亂兵，乃涇卒迴戈耳，無所統，正應大掠而過。如令有主，禍未可知。朱泚久在涇源，素得人心，今者在城，儻收涇卒扶持，則難制矣。計其倉皇未暇此謀，諸公能相逐徑往至泚宅，召之俱西乎？」諸公持疑，光晟卽奔馬詣泚曰：「人主出京，公爲大臣，豈是宴居之日？」泚曰：「願從公去。」命駕將行，而涇卒已集其門矣。光晟自將逃去，因爲泚所縻。然而奉泚甚力，每有戰常在其間。及神庭之陣，泚拜光晟僕射平章事，統兵出戰，大敗而還。方寤神告爲徵矣。《廣記》卷三〇四

李納

貞元初，平盧帥李納病篤，遣押衙王祐禱于岱嶽，齋戒而往。及嶽之西南，遙見山上有四五人，衣碧汗衫半臂。其餘三四人，雜色服飾，乃從者也。碧衣持彈弓，彈古樹上山鳥，一發而中，鳥墮樹，從者爭掩捉。王祐見前到山下人，盡下車卻蓋，向山齊拜。比祐欲到，路人皆止祐

下車：「此三郎子七郎子也。」遂拜碧衣人。從者揮路人令上車，路人躊躇，碧衣人自揮手，又令人上。持彈弓於殿西南，以彈弓斲地俯視，如有所伺。見王祐，乃召之前，曰：「何爲來？」祐具以對。碧衣曰：「君本使已來矣，何必更爲此行！要見使者乎？」遂命一人曰：「引王祐見本使。」遂開西院門引入，見李納荷校滅耳，踞席坐於庭。王祐驚泣前伏，抱納左脚，噬其膚。引者曰：「王祐可退。」却引出，碧衣猶在殿階，謂祐曰：「要見新使邪？」又命一人從東來，形狀短闊，神彩可愛。碧衣曰：「此君新使也。」祐拜訖無言。祐似欠噓而遲者久之，忽無所見，惟蒼苔松柏，悄然嚴靜，乃薦奠而迴。見納，納呼入卧內，問王祐，祐但以薦奠畢，擲樗蒲投具，得吉兆告納。納曰：「祐何不實言？何故噬吾足？」於是舉足，乃祐所噬足跡也。祐頓首，具以實告，納曰：「適見新使爲誰？」祐曰：「見則識，不知其名也。」納乃召三人出，至師古，曰：「此是也。」納遂授以後事，言畢而卒。王祐初見納荷校，問曰：「僕射何故如此？」納曰：「平生爲臣之辜也，蓋不得已如何，今日復奚言也！」《廣記》卷三〇五

沈聿

貞元中庶子沈華，致仕永崇里。其子聿，尉三原，素有別業在邑之西。聿因官遂修葺焉。於莊之北平原十餘里，垣古埏以建牛坊，秩滿因歸農焉。一日晝寢堂之東軒，忽驚寤，見二黃衣吏

謂聿曰：「府司召郎。」聿自謂官罷，無事詣府，拒之未行。二吏堅呼，聿不覺隨出，經歷親愛泊家人，揮霍告語，曾無應者。二吏呵驅甚迫，遂北行可二十里，至一城署，人民稀少，道路蕪蒼，正衙之東街，南北二巨門對啓。吏導入北門，止聿屏外，人云：「追沈聿到。」良久，廳上讀狀，付司責問。聿惶懼而逃，莫知所詣，遂突入南門。門內有廳，重施簾幙。聿危急，徑入簾下。則見紫衣貴人，寢書案後。聿欣有所投，又懼二吏之至，因聲氣撼動，紫衣遂寤，熟視聿曰：「子爲何者？」聿卽稱官及姓名，紫衣曰：「吾與子親且故，子其知乎？」聿驚惑未對，又曰：「子非張氏之彌甥乎！吾而祖舅也。子在人間，亦知張謂侍郎乎？」聿曰：「幼稚時則聞之，家有文集，尚能記念。」紫衣喜曰：「試爲我言。」聿念：「櫻桃解結垂簷子，楊柳能低入戶枝。」紫衣大悅，二吏走至前庭曰：「秋局召沈聿。」因遙拜，呼紫衣曰生曹，禮謁甚恭。紫衣謂曰：「沈聿吾之外孫也，爾可致吾意於秋局，希緩其期。」二吏承命而出，俄返曰：「敬依教。」紫衣曰：「爾死矣，宜速歸。」聿謝辭而出，吏伺聿於門，笑謂聿曰：「生曹之德，其可忘哉！」因引聿而南，聿大以酒食錢帛許之，忽若夢覺，日已夕矣。亦不以告人，卽令致奠二吏於野外，聿亦無恙。又五日，聿晚於莊門復見二吏曰：「冤訴不已，須得郎爲證。」聿卽詢其事犯，二吏曰：「郎建牛坊，平夷十古塚，大被論理，候郎對辯。」聿謂曰：「此主役之家人銀鑰擅意也。」二吏相顧曰：「置郎召奴或可矣。」因忽不見。其夜銀鑰氣蹙而卒。數日忽復遇二吏，謂聿曰：「銀鑰稱郎指教，屈辭甚切，郎宜自往。」聿又勤求，特希一爲

告於生曹，二吏許諾。有頃復至，曰：「生曹遣郎今夕潛遯，慎不得洩，藏伏三日，事則濟矣。」言訖不見。聿乃密擇捷馬，乘夜獨遊。聿曾於同州法輪寺寓居習業，因往詣之。及至，遇所友之僧出，因投其房，留宿累日。懼貽嚴君之憂，則徑歸京，不敢以實啓。莊夫至云：「前夜火發，北原之牛坊，已爲煨燼矣。」聿終免焉。《廣記》卷三〇七

永清縣廟

房州永清縣，去郡東百二十里，山邑殘毀，城郭蕭條。穆宗時，有縣令至任逾年，其弟寧省。乍覩牢落，不勝其憂。暇日，周覽四隅，無非榛棘，見荒廟巋然，土偶羅列，無門榜牌記，莫知誰氏，訪之邑吏，但云永清大王而已。令弟徙倚久之，昏然成寐，與神相接。神曰：「我名跡不顯久矣，鬱然欲自述其由，恐爲妖怪。今吾子致問，得伸積年之憤。我毗陵人也，大父子隱，吳書有傳。誅南山之虎，斬長橋之蛟，與民除害，陰功昭著。余素有壯志，以功佐時。余名廊，爲上帝所命，於金、商、均、房四郡之間捕驚獸。余數年之內，勦戮猛虎，不可勝數，生聚頓安。虎之首帥，在西城郡，其形偉博，便捷異常，身如白錦，額有圓光如鏡，害人最多，余亦誅之。居人懷恩，爲余立廟。自襄漢之北，藍關之南，凡三十餘處，皆余憩息之所也。歲祀緜遠，俗傳多誤，以余爲白虎神，幸君子訪問，願爲顯示，以正其非。」他日令弟言於襄陽從事，乃書版寘於廟中。塵

侵雨漬，文字將滅，大中壬申歲，襄州觀察判官王澄刻石於廟。《廣記》卷三〇七

按：本條明鈔本《廣記》作《錄異記》，待考。

凌華

杭州富陽獄吏曰凌華，骨狀不凡。常遇施翁相曰：「能捨吏，當爲上將軍。」華爲吏酷暴，每有縲紲者，必扼喉撞心，以取賄賂。元和初，病一夕而死。將死，見黃衫吏齎詔而前，宣云：「牒奉處分。以華昔日曾宰劇縣，甚著能績，後有缺行，敗其成功。謫官園扉，伺其修省，既迷所履，太乖乃心。玉枕癡然，委於庸賤。念茲貴骨，須有所歸。今鎮海軍討逆諸臣合爲上將，骨未圓實，難壯威稜，宜易之以得人，免塊然而妄處。付司追凌華，鑿玉枕骨送上。仍令所司量事優恤。」於是黃衫吏引入，有綠冠裳者隔簾語曰：「今日之來，德之不修也。見小吏而失祿，竊爲吾子惜焉。」命左右取鉗鎚，俄頃有緇衣豹袖執斤斧者三人。綠裳賜華酒五盃，昏然而醉，唯聞琢其腦，聲絕而華醉醒，復止華于西階以聽命。移時有宣言曰：「亡貴之人，理宜裨補，量延半紀，仍賚十千。」宣訖，綠裳延華升階，語曰：「吾漢朝隱屠釣之人也。蓋求全身，微規小利，既歿之後，貴受此官，位卑職猥，殊不快志。足下莫歎失其貴骨，此事稍大，非獨一人。」命酒與華對酌別，飲數盃，冥然無所知。既醒，宛然在廢牀之上，捫其腦而骨已亡。其儕流賻助，凡十千焉。

後十五年而卒。《廣記》卷三〇七

劉元迴

劉元迴者，狡妄人也。自言能鍊水銀作黃金，又巧以鬼道惑衆，衆多迷之，以是致富。李師古鎮平盧，招延四方之士，一藝者至，則厚給之。元迴遂以此術干師古。師古異之，面試其能，或十銖五銖，皆立成焉，蓋先以金屑置於汞中也。師古曰：「此誠至寶，宜何用？」元迴貴成其奸，不虞後害，乃曰：「雜之他藥，徐燒三年，可以飛仙；爲食器，可以避毒；以爲玩用，可以辟邪。」師古大神之。因曰：「再燒其期稍緩，子且爲我化十斤，將備吾所急之器也。」元迴本術此術，規師古錢帛，逡巡則謀遽去，爲師古縻之，專令燒金，其數極廣，元迴無從而致。因以鬼道說師古曰：「公紹續一方，三十餘載。雖戎馬倉廩，天下莫與之儔，然欲遣四方仰歸威德，所圖必遂者，須假神祇之力。」師古甚悅，因而詢之，元迴則曰：「泰嶽天齊王，玄宗東封，因以沉香刻製其像，所以玄宗享國永年。公能以他寶易其像，則受福與開元等矣。」師古狂悖，甚然之。元迴乃曰：「全軀而致，或恐卒不能辦，且以黃金十五斤鑄換其首，固當獲祐矣。」師古曰：「君便先爲燒之，速成其事。」元迴大笑曰：「天齊雖曰貴神，乃鬼類耳。若以吾金爲其首，豈冥鬼敢依至靈之物哉！是則斥逐天齊，何希其福哉。但以山澤純金而易之。則可矣。」師古尤異之，則以藏金二十

斤，恣元迴所爲，仍命元迴就嶽廟而易焉。元迴乃以鉛錫雜類，鎔其外而易之，懷其真金以歸，爲師古作飲食器皿，靡不辦集矣。師古尤加禮重，事之如兄，玉帛姬妾居第，資奉甚厚。明年師古方宴僚屬將吏，忽有庖人，自厨徑詣師古，於衆會之中，因舉身丈餘，蹈空而立，大詬曰：「我五嶽之神，是何賊盜，殘我儀質！我上訴於帝，涉歲方歸。及歸，我之甲兵軍馬，帑藏財物，皆爲黃石公所掠去。」則又極罵，復聳身數丈，良久履地，師古令曳去，庖人無復知覺，但若沉醉者數日。師古則令畫作戎車戰士，戈甲旌旗及紙錢綾帛數十車，就泰山而焚之。尚未悟元迴之奸，方將理之，而師古暴瘍，不數日腦潰而卒。其弟師道領事，卽令判官李文會、虞早等按之，元迴辭窮，戮之於市。《廣記》卷三〇八

馬總

馬總爲天平節度使，暇日方修遠書，時術人程居在旁。總憑几忽若假寐，而神色慘澹，不類於常。程不敢驚，乃徐起，詣其佐相元封告之。俄而總召元封，屏人謂曰：「異事！異事！某適有所詣，嚴邃崇闕，王者之居不若也。爲人導前，見故杜十丈司徒，笑而下階相迎曰：『久延望，甚喜相見。』因留連曰：『祐之此官，亦人世之中書令耳，六合之內，靡不關由。然久處會劇，心力殆倦，將求賢自代。公之識度，誠克大用，況親且故，所以奉邀，敬以相授。』總因辭退，至於泣

下。良久，杜乃曰：『既未爲願，則且歸矣，然二十年當復相見。』總既寤，大喜其壽之遐遠，自是後二年而薨。豈馬公誤聽，將祐增其年，以悅其意也？《廣記》卷三〇八

蔣琛

雪人蔣琛，精熟二經，常教授於鄉里。每秋冬，於雪溪太湖中流設網罟以給食。常獲巨龜，以其質狀殊異，乃顧而言曰：『雖人余且之網，俾免剝腸之患。既在四靈之列，得無愧於鄙叟乎？』乃釋之。龜及中流，凡返顧六七。後歲餘，一夕風雨晦冥，聞波間洶洶聲，則前之龜扣舷人立而言曰：『今夕太湖、雪溪、松江神境會，川瀆諸長，亦聞應召，開筵解榻，密邇漁舟。以足下淹滯此地，持網且久，纖鱗細介，苦於數網，脫禍之輩，常懷怨心。恐水族乘便，得肆胸臆。昔日恩遇，常貯懃誠，由斯而來，冀答萬一。能退咫尺以遠害乎？』琛曰：『諾。』遂於安流中纜舟以伺焉。未頃，有龜鼉魚鱉，不可勝計。周匝二里餘，蹙波爲城，遏浪爲地，闢三門，垣通衢。異怪千餘，皆人質螭首，執戈戟，列行伍，守衛如有所待。續有蛟蜃數十，東西馳來，乃噓氣爲樓臺，爲瓊宮珠殿，爲歌筵舞席，爲座榻衲褥，頃刻畢備。其尊疊器皿玩用之物，皆非人世所有。又有神魚數百，吐火珠，引甲士百餘輩，擁青衣黑冠者，由雪溪南津而出。復見水獸，亦數百，銜耀，引鐵騎二百餘，擁朱衣赤冠者，自太湖中流而來。至城門，下馬交拜，溪神曰：『一不展覲，五紀於茲。雖

魚雁不絕，而笑言久曠。勤企盛德，衷腸惄然。」湖神曰：「我心亦如之。」揖讓次，有老蛟前唱曰：「安流王上馬。」於是二神立候焉。則有衣虎豹之衣，朱其額，青其足，執蠟炬，引旌旗戈甲之卒，凡千餘，擁紫衣朱冠者，自松江西派而至。二神迎於門，設禮甚謹。敘暄涼竟，江神曰：「此去有將爲宰執者北渡，而神貌未揚，行李甚艱，恐神不識不知，事須帖屏翳收風，馮夷息浪，斯亦上帝素命。禮宜躬親，候吾子清塵，得免舉罰否？」然竊於水濱拉得范相國來，足以補其尤矣。」乃有披褐者仗劍而前，溪湖神曰：「欽奉實久。」范君曰：「涼德未泯，吳人懷恩。立祠於江濱，春秋設薄祀，爲村醪所困，遂爲江公驅來。唐突盛筵，益增慚慄。」於是揖讓入門。既卽席，則有老蛟前唱曰：「湘王去城二里。」俄聞駟闐車馬聲，則有綠衣玄冠者，氣貌甚偉，驅殿亦百餘，既升階，與三神相見。曰：「適輒與汨羅屈副使俱來。」乃有服飾與容貌慘悴者，偃僂而進。方卽席，范相笑謂屈原曰：「被放逐之臣，負波濤之困，讒痕謗跡，骨銷未滅，何慘面目，更獵其盃盤？」屈原曰：「湘岸之孤魂，魚腹之餘肉，焉敢將喉舌酬對相國乎！然吾聞穿七札之箭，不射籠中之鳥；剗洪鍾之劍，不剗几上之肉。且足下亡吳霸越，功成身退，逍遙於五湖之上，輝煥於萬古之後。故鄙夫竊仰重德盛名，不敢以常意奉待。何今日戲譁於綺席，恃意氣於放臣，則何異射病鳥於籠中，剗腐肉於几上！竊於君子惜金鏃與利刃也。」於是湘神動色，命酒罰范君。君將飲，有女樂數十輩，皆執所習於舞筵。有俳優揚言曰：「皤皤美女，唱《公無渡河歌》。其詞曰：『濁波

揚揚兮凝曉霧，公無渡河兮公竟渡。風號水激兮呼不聞，提衣看人兮中流去。浪排衣兮隨步沒，沉屍深入兮蛟螭窟。蛟螭盡醉兮君血乾，推出黃沙兮泛君骨。當時君死兮妾何適，遂就波瀾兮合魂魄。願持精衛銜石心，窮取河源塞泉脈。」歌竟，俳優復揚言：「謝秋娘舞《採桑曲》。」凡十餘疊。曲韻哀怨，舞未竟，外有宣言，申徒先生從河上來，徐處士與鴟夷君自海濱至。乃隨導而入，江溪湘湖禮接甚厚。屈大夫曰：「子非踣甕抱石抉眼之徒與？」對曰：「然。」屈曰：「余得朋矣。」於是朱絃雅張，清管徐奏，酌瑤觥，飛玉觴，陸海珍味，靡不臻極。舞竟，俳優又揚言：「曹娥唱《怨江波》。」凡五疊，琛所記者唯三。其詞云：「悲風淅淅兮波飜飜，蘆花萬里兮凝蒼煙。虬螭窟宅兮淵且玄，排波疊浪兮沉我天。所覆不全兮身寧全！溢眸恨血兮徒漣漣。誓將柔荑抉鋸牙之啄，空水府而藏其腥涎。青娥翠黛兮沉江壖，碧雲斜月兮空嬋娟。吞聲飲恨兮語無力，徒揚哀怨兮登歌筵。」歌竟，四座爲之慘容。江神把酒，太湖神起舞，作歌曰：「白露溥兮西風高，碧波萬里兮翻洪濤。莫言天下至柔者，載舟覆舟皆我曹。」江神傾盃起舞，作歌曰：「君不見夜來渡口擁千艘，中載萬姓之脂膏。當樓船泛泛於疊浪，恨珠貝又輕於鴻毛。又不見潮來津亭維一舫，中有一士青其袍。赴宰邑之良日，任波吼而風號。是知溺名溺利者，不免爲水府之腥臊。」湘王持盃，雪溪神歌曰：「山勢縈迴水脈分，水光山色翠連雲。四時盡入詩人詠，役殺吳興柳使君。」酒至溪神，湘王歌曰：「渺渺烟波接九疑，幾人經此泣江籬。年年綠水青山色，不改重華南狩時。」

於是范相國獻境會夜宴詩曰：「浪闊波澄秋氣涼，沉沉水殿夜初長。自憐休退五湖客，何幸追陪百谷王。香裊碧雲飄几席，觥飛白玉灑椒漿。酒酣獨泛扁舟去，笑入琴高不死鄉。」徐衍處士獻境會夜宴并簡范詩曰：「珠光龍耀火燿燿，夜接朝雲宴渚宮。鳳管清吹淒極浦，朱絃閒奏冷秋空。論心幸遇同歸友，揣分慚無輔佐功。雲雨各飛真境後，不堪波上起悲風。」屈大夫左持盃，右擊盤，朗朗作歌曰：「鳳騫騫以降瑞兮，患山雞之雜飛。玉溫溫以呈器兮，因砥砭之爭輝。當侯門之四關兮，堦嘉謨之重扉。既瑞器而無庸兮，宜昏暗之相微。徒剗石以爲舟兮，顧沿流而志違，將刻木而作羽兮，與超騰之理非。矜子子於空濶兮，靡羣援之可依。血淋淋而滂流兮，顧江魚之腹而將歸。西風蕭蕭兮湘水悠悠，白芷芳歇兮江籬秋。日晚晚兮川雲收，棹四起兮悲風幽。羈魂汨沒兮我名永浮，碧波雖涸兮厥譽長流。向使甘言順行於曩昔，豈今日居君王之座頭！是知貪名徇祿而隨世磨滅者，雖正寢而死兮，無得與吾儔。當鼎足之嘉會兮，獲周旋於君侯。雕盤玉豆兮羅珍羞，金卮瓊斚兮方獻酬。敢寫心兮歌一曲，無謂余持盃以淹留。」申屠先生獻境會夜宴詩曰：「行殿秋未晚，水宮風初涼。誰言此中夜，得接朝宗行。靈鼉振鑿鑿，神龍耀煌煌。紅樓壓波起，翠幄連雲張。玉簫冷吟秋，瑤瑟清含商。賢臻江湖叟，貴列川瀆王。諒予衰俗人，無能振積綱。分辭皆亂世，樂寐蛟螭鄉。棲遲幽島間，幾見波成桑。爾來盡流俗，難與傾壺觴。今日登華筵，稍覺神揚揚。方歡滄浪侶，遽恐白日光。海人瑞錦前，豈敢言文章。聊

歌靈境會，此會誠難忘。」鴟夷君銜盃作歌曰：「雲集大野兮血波洶洶，玄黃交戰兮吳無全壘。既霸業之將墜，宜嘉謨之不從。國步顛蹶兮，吾道遘凶。處鴟夷之大困，入淵泉之九重。上帝愍余之非辜兮，俾大江鼓怒其冤踪。所以鞭浪山而疾驅波岳，亦粗足展余拂鬱之心胸。當靈境之良宴兮，謬尊俎之相容。擊簫鼓兮撞歌鐘，吳謳越舞兮歡未極，遽軍城曉鼓之鑿鑿。願保上善之柔德，何行樂之地兮難相逢。」歌終，雪郡城樓早鼓絕，洞庭山寺晨鐘鳴，而飄風勃興，玄雲四起，波間車馬音猶合沓，頃之無所見。曙色既分，巨龜復延首於中流，顧眄琛而去。《廣記》卷三〇九

按：本條明鈔本《廣記》作《纂異記》，待考。

〔一〕「吾」原作「無」，據掃葉山房本《廣記》改。

陳導

唐陳導者，豫章人也，以商賈爲業。龍朔中，乃泛舟之楚，夜泊江浦。見一舟泝流而來，亦宿于此。導乃移舟近之，見一人厖眉大鼻，如吏，在舟檢勘文書，從者三五人。導以同旅相值，因問之曰：「君子何往？幸喜同宿此浦。」厖眉人曰：「某以公事到楚，幸此相遇。」導乃邀過船中，厖眉亦隨之。導備酒饌，飲經數巡，導乃問以姓氏。厖眉人曰：「某姓司徒名弁，被差至楚，已來充使。」導又問曰：「所主何公事也？」弁曰：「公不宜見問。君子此行，慎勿以楚爲意，願適他土。」

耳。」導曰：「何也？」弁曰：「吾非人也，冥司使者。」導驚曰：「何故不得之楚？」弁曰：「吾往楚行災，君亦其人也。感君之惠，故相報耳。然君須以錢物計會，方免斯難。」導懇苦求之，弁曰：「但俟吾從楚回，君可備緡錢一二萬相贖，當免君家。」導許諾，告謝而別。是歲果荆楚大火，延燒數萬家，蕩無孑遺。導自別弁後，以憂慮繫懷，及移舟而返，既至豫章，弁亦至矣。導以慳鄙爲性，託以他事，未辦所許錢。使者怒，乃令從者持書一緘與導。導開讀未終，而宅內掀然火起，凡所財物悉盡。是夕無損他室，惟燒導家。弁亦不見。蓋以導慳嗇負前約而致之也。《廣記》卷三二八

趙叔牙

貞元十四年戊寅夏五月旱，徐州散將趙叔牙移入新宅。夜中，有物窗外動搖窗紙聲，問之，其物自稱：「是鬼，吳時劉得言，窟宅在公牀下，往來稍難。公爲我移出，城南臺雨山下有雙大樹，是我妻墓，墓東埋之，後必相報。」叔牙明旦出城，視之信。卽日掘牀下，深三尺，得骸骨，如其言葬之。其夜鬼來言謝曰：「今時旱，不出三日有雨。公且告長史。」叔牙至明，通狀請祈雨，期三日雨足。節度使司空張建封許之，給其所須。叔牙於石佛山設壇，至三日，且無雨，當截耳。城中觀者數千人。時與寇鄰，建封以爲詐妄有謀，晚衙杖殺之。昏時大雨，卽令致祭，補男爲散騎。時人以爲事君當誠實，今趙叔牙隱鬼所報雨至之期，故自當死耳。《廣記》卷三四二

按：《廣記》談刻本作《祥異記》，明鈔本作《集異記》，錄存備考。

劉惟清

平陰北把關，南禦並山濱濟，空闊百里無人居，地勢險阨，用兵者先據此爲勝。迄今天陰日暮，鬼怪往往而出。長慶三年春，平盧節度使薛平遣衙門將劉惟清使于東平，途出于此。時日已落，忽於野次，遙見幕幄營伍，旌旗人馬甚衆，煙火極遠。惟清少在戎旅，計其部分，可五六萬人。惟清不知，甚駭之。俄有輜重鼓角，部隊紛紜，或歌或語，諠然競進，惟清乃緩轡出於其中。忽有衣縵者徒行叩惟清，將奪馬，惟清與之力爭，因躍馬絕道，而縵者執之愈急。惟清有膂力，以所執鐵鞭連箠其背。縵者不甚拒，良久捨去。惟清復路，則向之軍旅已過矣。夜闌，方及前驛。會同列將渾釗，自滑使還，亦館於此。聞惟清至，迎之，則惟清冥然無所知。衆扶持環視，久之乃寤，遂話此事。不一三日，至東平，既就館，亦不爲他人道。先是東平有術士皇甫嗜者，落魄不仕，衣襦藍縷，衆甚鄙之。一日，惟清出遊，嗜于途中遙指曰：「劉押衙。」惟清素衣未識，因與相款。嗜曰：「本恐他人取馬，故牽公避道。奈何却以鐵鞭相苦！賴我金鎧在身，不遜。」巨力堅策，豈易當哉！笑而竟去。惟清從人辭謝，將問其故。嗜躍入稠人中，不可復見。後四年，李同捷反于滄、景。時天下兵，皆由平陰以入賊境，豈陰兵先致討歟！

《廣記》卷三四六

按：《廣記》談刻本作《異聞錄》，明鈔本作《集異記》。

〔一〕明鈔本「素」下無「衣」字。

〔三〕「邇」疑當作「爾」。

鄔濤

鄔濤者，汝南人，精習墳典，好道術。旅泊婺州義烏縣館，月餘，忽有一女子，侍二婢夜至。一婢進曰：「此王氏小娘子也，今夕願降於君。」濤視之，乃絕色也。謂是豪貴之女，不敢答。王氏笑曰：「秀才不以酒色於懷，妾何以奉託？」濤乃起拜曰：「凡陋之士，非敢是望。」王氏令侍婢施服玩於濤寢室，炳以銀燭，又備酒食。飲數巡，王氏起謂濤曰：「妾少孤無託，今願侍君子枕席，將爲可乎？」濤遜辭而許。恩意款洽，而王氏曉去夕至，如此數月。濤所知道士楊景霄至館訪之，見濤色有異，曰：「公爲鬼魅所惑，宜斷之，不然死矣！」濤聞之驚，以其事具告。景霄曰：「此乃鬼也。」乃與符二道，一施衣帶，一置門上，曰：「此鬼來，當有怨恨，慎勿與語。」濤依法受之。女子是夕至，見符門上，大罵而去，曰：「來日速除之，不然生禍。」濤明日訪景霄，具言之。景霄曰：「今夜再來，可以吾呪水灑之，此必絕矣。」濤持水歸。至夜，女子復至，悲恚之甚，濤乃以景霄呪水灑之，於是遂絕。《廣記》卷三四七

李佐文

南陽臨湍縣北界，秘書郎袁測、襄陽掾王洸皆立別業。大和六年，客有李佐文者，旅食二莊。佐文琴棋之流，頗爲袁、王之所愛。佐文一日向暮，將止袁莊。僕夫抱衾前去，不一二里，陰風驟起，寒埃昏晦，俄而夜黑，劣乘獨行，迷誤甚遠。約三更，晦稍息，數里之外，遙見火燭，佐文向明而至。至則野中迴室，卑狹頗甚，中有田叟，織芒屨。佐文遜辭請託，久之，方延入戶。叟云：「此多豺狼，客馬不宜遠繫。」佐文因移簷下，迫火而憩。叟曰：「客本何詣而來此？」佐文告之。叟哂曰：「此去袁莊，乖於極矣。然必俟曉，方可南歸。」而叟之坐後，緯蕭障下，時聞稚兒啼號甚痛。每發聲，叟卽曰：「兒可止。事已如此，悲哭奈何！」俄則復啼，叟輒以前語解之。佐文不論，從而詰之，叟則低回他說。佐文因曰：「孩幼苦寒，何不攜之近火。」如此數四，叟則攜致就爐，乃八九歲村女子耳。見客初無羞駭，但以物畫灰，若抱沉恨。忽而怨咽驚號，叟則又以前語解之。佐文問之，終不得其情。須臾平曉，叟卽遙指東南喬木曰：「彼袁莊也，去此十里而近。」佐文上馬四顧，乃窮荒大野，曾無人迹，獨田叟一室耳。行三數里，逢村婦，攜酒一壺，紙錢副焉。見佐文曰：「此是巨澤，道無人，客凌晨何自來也？」佐文具白其事。婦乃拊膺長號曰：「孰爲人鬼之遇途耶！」佐文細詢之，其婦曰：「若客云去夜所寄宿之室，則

我亡夫之殯閭耳。我傭居袁莊七年矣，前春，夫暴疾而卒。翌日，始亂之女又亡。貧窮無力，父子同瘞焉。守制嫠居，官不免稅，孤窮無託，遂意再行。今夕將適他門，故來夫女之瘞告訣耳。」佐文則與同往，比至昨暮之室，乃殯宮也。歷歷蹤由，分明可復。婦乃號慟，淚如縷縻。因棄生業，剪髮於臨湍佛寺，役力誓死焉。其婦姓王，開成四年，客有見者。《廣記》卷三四七

金友章

金友章者，河內人，隱於蒲州中條山，凡五載。山有女子，日常挈餅而汲溪水，容貌殊麗。友章於齋中遙見，心甚悅之。一日，女子復汲，友章蹣蹣企戶而調之曰：「誰家麗人，頻此汲耶？」女子笑曰：「澗下流泉，本無常主。須則取之，豈有定限。先不相知，一何造次。然兒止居近里，少小孤遺，今且託身於姨舍。艱危受盡，無以自適。」友章曰：「娘子既未適人，友章方謀婚媾，既偶夙心，無宜遐棄。未委如何耳？」女曰：「君子既不以貌陋見鄙，妾焉敢拒違。然候夜而赴佳命。」言訖，女子汲水而去。是夕果至，友章迎之入室。夫婦之道，久而益敬。友章每夜讀書，常至宵分，妻常坐伴之，如此半年矣。一夕，友章如常執卷，而妻不坐，但佇立侍坐。友章詰之，以他事告。友章乃令妻就寢。妻曰：「君今夜歸房，慎勿執燭，妾之幸矣。」既而友章秉燭就榻，即於被下見其妻，乃一枯骨耳。友章惋歎良久，復以被覆之。須臾乃復本形，因大悸怖，而謂友章

曰：「妾非人也，乃山南枯骨之精。居此山北，有恒明王者，鬼之首也，常每月一朝。妾自事金郎，半年都不至彼。向爲鬼使所錄，榜妾鐵杖百。妾受此楚毒，不勝其苦。向以化身未得，豈意金郎視之也。事以彰矣，君宜速出，更不留戀。蓋此山中，凡物總有精魅附之，恐損金郎。」言訖，涕泣嗚咽，因爾不見。友章亦悽恨而去。《廣記》卷三六四

于凝

岐人于凝者，性嗜酒，常往來邠涇間。故人宰宜祿，因訪飲酒，涉旬乃返。既而宿醒未愈，令僮僕先路，以備休憩。時孟夏，麥野韶潤，緩轡而行。遙見道左嘉木美蔭，因就焉。至則繫馬藉草，坐未定，忽見馬首南顧，鼻息恐駭，若有覩焉。凝則隨向觀之，百步外，有枯骨如雪，箕踞於荒塚之上，五體百骸，無有不具，眼鼻皆通明，背肋玲瓏，枝節可數。凝卽跨馬稍前，枯骨乃開口吹噓，槁葉輕塵，紛然自出。上有烏鳶紛飛，嘲噪甚衆。凝良久稍逼，枯骨乃竦然挺立，骨節絕偉。凝心悸，馬亦驚走，遂馳赴旅舍，而先路僮僕出迎，相顧駭曰：「郎君神思，一何慘悴？」凝卽說之。適有涇倅十餘，各執長短兵援蕃，覘以東，皆曰：「豈有是哉！」泊逆旅少年輩，集聚極衆，凝卽爲之導前，仍與衆約曰：「儻或尚在，當共碎之。雖然，恐不得見矣。」俄至其處，而端坐如故。或則叫噪，曾不動搖。或則彎弓發矢，又無中者。或欲環之前進，則亦相顧莫能先焉。久

之，枯骸歟然自起，徐徐南去。日勢已晚，衆各恐讐，稍稍遂散。凝亦鞭馬而迴。遠望尚見烏鵲翔集，遂去不散。自後凝屢經其地，及詢左近居人，乃無復見者。《廣記》卷三六四

宮山僧

宮山，在沂州之西鄙，孤拔聳峭，迴出衆峰。環三十里，皆無人居。貞元初，有二僧至山，蔭木而居。精勤禮念，以晝繼夜。四遠村落，爲構屋室，不旬日，院宇立焉。二僧尤加慤勵，誓不出房二十餘載。元和中，冬夜月明，二僧各在東西廊，朗聲唄唱。空中虛靜，時聞山下有男子慟哭之聲，稍近，須臾則及院門。二僧不動，哭聲亦止。踰垣遂入，東廊僧遙見其身絕大，躍入西廊，而唄唱之聲尋輟，如聞相擊撲爭力之狀。久又聞咀嚼啖噬，啜吒甚勵。東廊僧惶駭突走，久不出山，都忘途路，或仆或蹶，氣力殆盡。迴望見其人，踉蹌將至，則又跳迸。忽逢一水，兼衣徑渡畢，而追者適至，遙詬曰：「不阻水，當併食之。」東廊僧且懼且行，罔知所詣。俄而大雪，咫尺昏迷，忽得人家牛坊，遂隱身於其中。夜久雪勢稍晴，忽見一黑衣人，自外執刀鎗徐至欄下。東廊僧省息屏氣，向明潛窺，黑衣踟躕徙倚，如有所伺。有頃，忽院牆中殷過兩囊衣物之類，「」，黑衣取之，束縛負擔。續有一女子攀牆而出，黑衣挈之而去。僧懼涉蹤踪，則又逃竄，恍惚莫知所之。不十數里，忽墜廢井，井中有死者，身首已離，血體猶暖，蓋適遭殺者也。僧驚悸不知所爲。俄而

天明，視之，則昨夜攀牆女子也。久之，卽有捕逐者數輩偕至，下窺曰：「盜在此矣。」遂以索縋人就井繫縛，加以毆擊，與死爲鄰。及引上，則以昨夜之事本末陳述。而村人有曾至山中，識爲東廊僧者。然且與死女子俱得，未能自解。乃送之於邑，又細列其由，謂西廊僧已爲異物啖噬矣。邑遣吏至山中尋驗，西廊僧端居無恙，曰：「初無物。但將二更，方對持念，東廊僧忽然獨去。久與誓約，不出院門，驚異之際，追呼已不及矣。山下之事，我則不知。」邑吏遂以東廊僧誑妄，執爲殺人之盜，榜掠薰灼，楚痛備施。僧冤痛誣，甘置於死。賊狀無據，法吏終無以成其獄也。逾月，而殺女竊資之盜他處發敗，具得情實，僧乃冤免。《廣記》卷三六五

〔一〕「囊」原作「廊」，據明鈔本《廣記》改。

李楚賓

李楚賓者，楚人也。性剛傲，惟以畋獵爲事，凡出獵無不大獲。時童元範家住青山，母嘗染疾，晝常無苦，至夜卽發。如是一載，醫藥備至，而絕無瘳減。時建中初，有善易者朱邯，歸豫章，路經範舍，邯爲筮之，乃謂元範曰：「君今日未時，可具衫服於道側伺之。當有執弓挾矢過者，君能求之，斯人必愈君母之疾，且究其原矣。」元範如言，果得楚賓，張弓驟馬至。元範拜請過舍，賓曰：「今早未有所獲，君何見留？」元範以其母疾告之，賓許諾。元範備飲膳，遂宿

楚賓於西廡。是夜月明如晝，楚賓乃出戶，見空中有一大鳥，飛來元範堂舍上，引喙啄屋，卽聞堂中叫聲，痛楚難忍。楚賓揆之曰：「此其妖魅也。」乃引弓射之，兩發皆中。其鳥因爾飛去，堂中哀痛之聲亦止。至曉，楚賓謂元範曰：「吾昨夜已爲子除母害矣。」乃與元範遶舍遍索，俱無所見。因至壞屋中，碓程古址，有箭兩隻。所中箭處，皆有血光。元範遂以火燔之，精怪乃絕。母患自此平復。《廣記》卷三六九

張式

張式幼孤，奉遺命葬於洛京。時周士龍識地形，稱郭璞青烏之流也。式與同之外野，歷覽三日而無獲。夜宿村舍。時冬寒，室內惟一榻，式則籍地，士龍據榻以憩。士龍夜久不寐，式兼衣擁爐而寢，歛然驚魘曰：「親家。」士龍遽呼之，式固不自知。久而復寐，又驚魘曰：「親家。」士龍又呼之，式亦自不知所謂。及曉，又與士龍同行。出村之南，南有土山。士龍駐馬遙望曰：「氣勢殊佳。」則與式步履久之。南有村夫伐木，遠見士龍相地，則荷斧遽至曰：「官等得非擇葬地乎？此地乃某之親家所有。如何，則某請導致焉。」士龍謂式曰：「疇昔夜夢再驚，皆曰親家，豈非神明前定之證與？」遂卜葬焉。而式累世清貴。《廣記》卷三九〇

徐智通

唐徐智通，楚州醫士也。夏夜乘月，於柳堤閑步。忽有二客笑語於河橋，不虞智通之在陰翳也，相謂曰：「明晨何以爲樂？」一曰：「無如南海赤巖山弄珠耳。」答曰：「赤巖主人嗜酒，留客必醉。僕來日未後，有事於西海，去恐復爲縈滯也。不如只於此郡龍興寺前，與吾子較技耳。」曰：「君將何戲？」曰：「寺前古槐僅百株，我霆震一聲，剖爲纖莖，長短粗細，悉如食筴。君何以敵？」答曰：「寺前素爲郡之戲場，每日中，聚觀之徒，通計不下三萬人。我霆震一聲，盡散其髮，每縷仍爲七結。」二人因大笑，約諾而去。智通異之，卽告交友六七人，遲明，先俟之。是時晴朗，巳午間，忽有二雲，大如車輪，凝於寺上。須臾昏黑，咫尺莫辨。俄而霆震兩聲，人畜頓踣。及開霽，寺前槐林，劈枕分散，布之於地，皆如算子，小大洪纖，無不相肖。而寺前負販、戲弄、觀看人數萬衆，髮悉解散，每縷皆爲七結。《廣記》卷三九四

裴用

唐大和，濮州軍吏裴用者，家富於財。年六十二，病死。既葬旬日，霆震其墓，棺飛出百許步，屍柩零落。其家卽選他處重瘞焉，仍用大鐵索繫纜其棺。未幾震如前。復選他處重瘞，不

旬日，震復如前。而棺柩灰盡，不可得而收矣。因設靈儀，招魂以葬。《廣記》卷三九四

李勉

司徒李勉，開元初作尉浚儀。秩滿，沿汴將遊廣陵。行及睢陽，忽有波斯胡老疾杖策，詣勉曰：「異鄉子抱恙甚殆，思歸江都。知公長者，願托仁蔭，皆異不勞而獲護焉。」勉哀之，因命登艫，仍給饘粥。胡人極懷慚愧，因曰：「我本王貴種也，商販于此，已逾二十年。家有三子，計必有求吾來者。」不日舟止泗上，其人疾亟，因屏人告勉曰：「吾國內頃亡傳國寶珠，募能獲者，世家公相。吾銜其鑒而貪其位，因是去鄉而來尋。近已得之，將歸卽富貴矣。其珠價當百萬。吾懼懷寶越鄉，因剖肉而藏焉。不幸遇疾，今將死矣。感公恩義，敬以相奉。」卽抽刀決股，珠出而絕。勉遂資其衣衾，瘞於淮上。掩坎之際，因密以珠含之而去。既抵維揚，寓目旗亭，忽與羣胡左右依隨，因得言語相接。傍有胡雛，質貌肖逝者。勉卽詢訪，果與逝者所紱契會。勉卽究問事迹，乃亡胡之子。告瘞其所，胡雛號泣，發墓取而去。《廣記》卷四〇二

嘉陵江巨木

閬州城臨嘉陵江，江之澚有烏陽巨木，長百餘尺，圍將半焉，漂泊搖撼於江波者久矣，而莫

知奚自。閩之耆舊相傳云，堯時汎洪水而至，亦靡據焉。襄漢節度使渤海高元裕，大和九年自中書舍人牧閩中，下車未幾，亦嘗見之，固以爲異矣。忽一日，津吏啓事曰：「江中巨木由來東首，去夜無端翻然西顧。」高益奇之，卽與賓寮逕往觀焉。因廣召舟子泊軍吏羣民輩，則以大索羈而出之。初無艱阻，隨拖登岸。太半之後，屹而不前。雖千夫百牛，莫能引之。人力既竭，復如前時。自是日曝風吹，僵然沙上。或則寺僧欲以爲宰堵波之獨柱，或則州吏請支分割剝，以備衆材。高以奇偉異常，皆莫之許。每擬還之於江，但慮勞人，遂巡未果。開成三年上元日，高准式行香於開元觀，寮吏畢至。高欲因衆力，得共牽復其木焉。及至，則又廣備縻索，多聚勇力，將作氣引拽之際，而巨木因依假藉，若自轉移，輕然已復於江矣。拒江尚餘尺許，歛然驚迸，百支巨索，皆如斬截。其木則沿洄汨沒徑去，絕江上及中流，寂然遂隱。高遣善泅者數輩，遽往觀之。江水清澈，毫髮可見。善遊者熟視而迴，皆曰：「水中別有東西二木，巨細與斯木無異。適自岸而至者，則南北叢焉。」高顧坐客，靡不駭愕。自是則不復得而見矣。有頃，高除諫議大夫。制到，詳其授官之日，卽高役功之辰也。向使斯旬朔未獲移徙，高之新命既至，則那復留意乎轉遷，俾之仍舊。

《廣記》卷四〇五

江淮市人桃核

水部員外郎杜涉，嘗見江淮市人桃核扇，量米止容一升。言於九疑山溪中得。

《廣記》卷四

〇五

光化寺客

兗州徂徠山寺曰光化，客有習儒業者，堅志棲焉。夏日涼天，因閱壁畫於廊序，忽逢白衣美女，年十五六，姿貌絕異。客詢其來，笑而應曰：「家在山前。」客心知山前無是子，亦未疑妖。但心以殊尤，貪其觀視，且挑且悅，因誘致於室。交歡結義，情款甚密。白衣曰：「幸不以村野見鄙，誓當永奉恩顧。然今晚須去，復來則可以不別矣。」客因留連，百端徧盡，而終不可。素寶白玉指環，因以遺之，曰：「幸視此，可以速還。」因送行，白衣曰：「恐家人接迎，願且回去。」客卽上寺門樓隱身目送，白衣行計百步許，奄然不見。客乃識其滅處，徑尋究。寺前舒平數里，纖木細草，毫髮無隱，履歷詳熟，曾無踪跡。暮將回，草中見百合苗一枝，白花絕偉，客因斲之。根本如拱，瑰異不類常者。及歸，乃啓其重付，百疊既盡，白玉指環宛在其內。乃驚歎悔恨，恍惚成病，一句而斃。

《廣記》卷四一七

劉禹錫

唐連州刺史劉禹錫，貞元中，寓居榮澤。首夏獨坐林亭，忽然間大雨，天地昏黑，久方開霽。獨亭中杏樹，雲氣不散。禹錫就視，樹下有一物，形如龜鱉，腥穢頗甚，大五斗釜。禹錫因以瓦礫投之，其物卽緩緩登階，止于簷柱。禹錫乃退立於牀下，支策以觀之。其物仰視柱杪，款以前趾，抉去半柱。因大震一聲，屋瓦飛紛亂下，亭內東壁，上下罅裂丈許。先是亭東紫花苜蓿數畝，禹錫時於裂處分明遙見。雷既收聲，其物亦失，而東壁之裂亦已自吻合矣。禹錫亟視之，苜蓿如故，壁曾無動處。《廣記》卷四三二

裴越客

唐乾元初，吏部尚書張鎬貶袁州司戶。先是鎬之在京，以次女德容，與僕射裴冕第三子前藍田尉越客結婚焉。已剋迎日，而鎬左遷，遂改期來歲之春季。其年越客則速裝南邁，以畢嘉禮。春仲，拒宸百里，鎬知其將至矣。張斥在遠，方抱憂惕，深喜越客遵約而至，因命家族宴於花園，而德容亦隨姑姨妹遊焉。山郡蕭條，竹樹交密。日暮衆將歸，或後或先，紛紜笑語，忽有猛虎出自竹間，遂擒德容跳入翳薈。衆皆驚駭，奔告張。夜色已昏，計力俱盡，舉家號哭，莫

知所爲。及曉則大發人徒，求骸骨於山野間。週迴遠近，曾無蹤跡。由是夕之前夜，越客行舟去郡三二十里，尚未知其妻之爲虎暴，乃召僕夫十數輩登岸徐行，而船亦隨焉。不二三里，遇水次板屋，屋內有榻，因掃拂，卽之憩焉。僕從羅列於前後。俄聞有物來自林木之間，衆乃靜伺。微月之下，忽見猛虎負一物至。衆皆惶撓，則共闕喝之，仍大擊板屋并物。其虎徐行，尋俯於板屋側，留下所負物，遂入山間。共窺看，云是人，尚有餘喘。越客卽令舁之登舟，因促使解纜，然後船中烈燭熟視，乃是十六七美女也，容貌衣服，固非村間之所有。越客深異之，則遣羣婢看眴之，雖髻被散，衣破服裂，而身膚無少損。羣婢漸以湯飲灌之，卽能微微入口。久之神氣安集，俄復開目。與之言語，莫肯應。夜久卽有自郡至者，皆云張尚書次女昨夜遊園，爲暴虎所食，至今求其殘骸未獲。聞者遂以告之於越客，卽遣羣婢，具以此詢。德容因號啼不止。越客既登岸，遂以其事列於鎬。鎬凌晨躍馬而至，既悲且喜，遂與同歸，而婚媾果諧其期。自是黔峽往往建立虎媒之祠焉。今尚有存者。《廣記》卷四二八

丁巖

貞元十四年中，多虎暴，白晝噬人。時淮上阻兵，因以武將王徵牧申州焉。徵至，則大修擒虎具，兵仗坑穽，靡不備設。又重懸購，得一虎而酬十緡焉。有老卒丁巖者，善爲陷穽，遂列於

太守請山間至路隅，張設以圖之。徵既許，不數日而獲一虎焉。虎在深坑，無施勇力。巖遂俯而下視，加以侮誚。虎則跳躍哮吼，怒聲如雷。而聚觀之徒，千百其衆，巖銜其計得，誇喜異常。時方被酒，因爲衣襟冑掛樹根，而墜奔中。衆共嗟駭，謂糜粉於暴虎之爪牙矣。及就窺，巖乃端坐，而虎但瞪視耳。巖之親愛憂巖，乃共設計，以轆轤下巨索，伺巖自縛，當遽引上，或希十一之全。巖得索，則纏縛腰肢，揮手，外人則共引之。去地三二尺，其虎則以前足捉其索而留焉。意態極仁，如此數四。巖因而謂之曰：「爾輩縱暴，人郭犯人，事須剪除，理宜及此。顧爾之命，且在頃刻。吾因沉醉，誤落此中。衆所未便屠者，蓋以我故也。爾若損我，固激怒衆人。我氣未絕，卽當薪火亂投，爾爲灰燼矣。爾不若從吾，當啓白太守，捨爾之命，冀爾率領羣輩，遠離此土。斯亦渡河他適，爾所知者矣。我當質之天日，不渝此約。」其虎諦聽，若有知解。巖則引繩，衆共出之。虎乃弭耳矚目，不復留。巖既得出，遂以其事白於邦伯曰：「今殺一虎，不足襁羣輩之暴。況與試約，乞捨之。冀其率侶四出，管界獲寧耳。」徵許之。巖遂以太守之意，丁寧告諭。虎於陷中，踴躍盤旋，如荷恩施。巖卽積土坑側，稍益淺，猶深丈許，虎乃躍而出，奮迅躑躑，嘯風而逝。自是旬朔之內，羣虎屏跡，而山野宴然矣。吁！保全軀命之計，雖在異類，亦有可觀者焉。若暴虎之猛悍，況厄陷奔，得人固當恣其狂怒，決裂噬嚙，以豁其情。斯虎乃因巖以圖全，而果諧焉。何其智哉！而巖能以言詞誘諭，通於強戾，果致族行出境之異，況免掛冑之

害，又何智哉！斯乃信誠交感之致耳。於戲！信誠之爲物也，何其神歟！《廣記》卷四二九

王瑤

漢州西四十五里，有富叟王瑤。所居水竹園林，占一川之勝境，而往來之人，多迂道以經焉。既至，瑤必盡誠接待。有賣瓦金石生者〔一〕，常言住在西山，每來必休於此。積十數年，率五日一至，瑤密異之。外視其所買，又非山中所用者。一日瑤伺其來，因竭力奉之。石亦無愧。近晚將去，瑤曰：「思至生居，爲日久矣。今日幸願階焉。」石生曰：「吾敝土窮山，不足爲訪。」瑤卽隨行十餘里。暝色將起，石生曰：「爾可還矣。」瑤曰：「竊慕高躅，願效誠力。但生所欲，皆可以奉，所以求知其居焉。」石生固辭，瑤追從不已。石生忽以拄杖畫地，遂爲巨壑，而身亦騰爲白虎，哮吼顧瞻。瑤驚駭惶怖，因蒙面匍匐而走。明日再往，曾無人跡，自是石生不復經過矣。《廣記》卷四三三

〔一〕「金」，掃葉山房本《廣記》作「釜」。

崔韜

崔韜，蒲州人也，旅遊滁州，南抵歷陽。曉發滁州，至仁義館宿，館吏曰：「此館凶惡，幸

無宿也。」韜不聽，負笈昇廳。館吏備燈燭訖。而韜至二更，展衾方欲就寢，忽見館門有一大足如獸。俄然其門豁開，見一虎自門而入。韜驚走，於暗處潛伏視之，見獸於中庭，脫去獸皮，見一女子，奇麗嚴飾，昇廳而上，乃就韜衾。出問之曰：「何故宿余衾而寢？」韜適見汝爲獸人來，何也？」女子起謂韜曰：「願君子無所怪。妾父兄以畋獵爲事，家貧，欲求良匹，無從自達，乃夜潛將虎皮爲衣。知君子宿於是館，故欲託身，以備灑掃。前後賓旅，皆自怖而殞。妾今夜幸逢達人，願察斯志。」韜曰：「誠如此意，願奉懽好。」來日韜取獸皮衣，棄廳後枯井中，乃挈女子而去。後韜明經擢第，任宣城，時韜妻及男將赴任，與俱行，月餘，復宿仁義館，韜笑曰：「此館乃與子始會之地也。」韜往視井中，獸皮衣宛然如故。韜又笑謂其妻子曰：「往日卿所著之衣猶在。」妻曰：「可令人取之。」既得，妻笑謂韜曰：「妾試更著之。」妻乃下階，將獸皮衣著之，纔畢，乃化爲虎，跳躑哮吼，奮而上廳，食子及韜而去。《廣記》卷四三三

〔一〕此下原有「衣猶在請」四字，據明鈔本、許本《廣記》刪。

楊褒

楊褒者，廬江人也。褒旅遊至親知舍，其家貧無備，舍惟養一犬，欲烹而飼之。其犬乃跪前足，以目視褒。異而止之，不令殺。乃求之，親知奉褒。將犬歸舍，經月餘，常隨出入。

褒妻乃異志於褒，褒莫知之。經歲時，後褒妻與外密契，欲殺褒。褒是夕醉歸，妻乃伺其外來殺褒。既至，方欲入室，其犬乃齧折其足，乃咬褒妻，二人俱傷甚矣。鄰里俱至救之，褒醒，見而搜之，果獲其刀。鄰里聞之，送縣推鞠，妻以實告。褒妻及懷刀者，並處極法。《廣記》卷四三七

鄭韶

鄭韶者，隋煬帝時左散騎常侍，大業中，授閩中太守。韶養一犬，憐愛過子。韶有從者數十人，內有薛元周者，韶未達之日已事之。韶遷太守，略無恩恤。元周忿恨，以刃久伺其便，無得焉。時在閩中，隋煬帝有使到，韶排馬遠迎之。其犬乃銜拽衣襟，不令出宅。館吏馳告云：「使人郭。」韶將欲出，爲犬拽衣不放。韶怒，令人縛之於柱。韶出使宅大門，其犬乃掣斷繩而走，依前拽韶衣不令去。韶撫犬曰：「汝知吾有不測之事乎？」犬乃嗥吠，跳身於元周隊內，咬殺薛元周。韶差人搜元周衣下，果藏短劍耳。《廣記》卷四三七

柳超

柳超者，唐中宗朝爲諫議大夫，因得罪，黜於嶺外。超以清儉自守，凡所經州郡，不干撓廉牧以自給。而領二奴掌閣、掌書，并一犬，至江州，超以鬱憤成疾。二奴欲圖其資裝，乃共謀曰：

「可奉毒藥於諫議，我等取財而爲良人，豈不好乎？」掌書曰：「善。」掌閣乃啓超曰：「人言有密詔到，不全諫議命。諫議家族將爲奈何？」超曰：「然。汝等當修饌，伺吾食畢，可進毒於吾，吾甘死矣。」掌閣等聞言，乃備珍饌，掌閣在厨修辦，掌書進之於超。超食次，忽見其犬，乃分與食之，涕泣撫犬曰：「我今日死矣，汝託於何人耶！」犬聞之不食，走入厨，乃咬掌閣喉，復至堂前嚙掌書。二奴俱爲犬所害。超未曉其事，後經數日，敕詔還京，而復雪免，方知其犬之靈矣。《廣記》卷四三七

范翊

范翊者，河東人也，以武藝授裨將。養一犬，甚異人性。翊有親知陳福，亦署裨將，翊差往淮南充使，收市綿綺，時福充副焉。翊因酒席，恃氣而蔑福，因成讐恨。乃暗搆翊罪，潛狀申主帥。主帥不曉其由，謂其撻實，乃停翊職。翊飲恨而歸，福乃大獲補署。其犬見翊沉廢，乃往福舍，伺其睡，咋斷其首，銜歸示翊。翊驚懼，將福首級，領犬詣主帥請罪。主帥詰之，翊以前事聞。主帥察之，却歸翊本職，其犬主帥留在使宅。《廣記》卷四三七

盧言

盧言者，上黨人也，常旅泊他邑。路行忽見一犬，羸瘦將死矣。言憫之，乃收養。經旬日，

其犬甚肥腩〔一〕，自爾凡所歷郡邑，悉領之。後將抵亳，忽於市肆遇友人邀飲，大醉而歸。乃入房就寢。俄而鄰店火發，犬忙迫，乃上牀於言首嚙吠，又銜衣拽之。言忽驚起，乃見火已燬其屋柱，透走而出，方免斯難。《廣記》卷四三七

〔一〕「腩」原作「悅」，據掃葉山房本《廣記》改。

齊瓊

唐禁軍大校齊瓊者，始以馳騁大承恩寵，以是假御中銜，至於劇憲。家畜良犬四，常畋迴廣囿，輒飼以梁肉。其一獨填茹咽喉齒牙間以出，如隱叢薄然後食，食已則復至。齊竊異之。一日令僕伺其所往，則北垣枯竇，有母存焉，老瘠疥穢，吐哺以飼。齊亦義者，奇嘆久之，乃命篋牝犬歸，以敗茵席之，餘餅餌飽之。犬則搖尾俯首，若懷知感。爾後擒奸逐狡，指顧如飛，將廬獵駕前，必獲豐賞。逾年牝死，犬加勤効。又更律琯，齊亦殂落。犬嗥吠終夕，呱呱不輟。越月，將有事於邱隴，則留獒以禦奸盜。及懸窆之夕，犬獨以足爬土成坳，首叩棺見血。掩土未畢，犬亦致斃。《廣記》卷四三七

按：本條《廣記》談刻本作《述異記》，誤。明鈔本作《集異記》，今從之。

田招

田招者，廣陵人也。貞元初，招以他事至於宛陵。時招有表弟薛襲在彼。襲見招至，主禮極厚。因一日招謂襲曰：「我思犬肉食之。」襲乃諸處覓之，了不可得。招曰：「汝家內犬何用？可殺而食之。」襲曰：「此犬養來多時，誰忍下手？」招曰：「吾與汝殺之。」言訖，招欲取犬，忽乃失之，莫可求覓。後經旬日，招告襲將歸廣陵，襲以親表之分，遂重禮而遣之。招出郭，至竹室步歇次，忽見襲犬在道側。招認而呼之，其犬乃搖尾隨之。招夜至旅店，將宿，其犬亦隨而宿之，伺招睡，乃咋其首，銜歸焉。襲懼，遂以茲事白於州縣。太守遣人覆驗，異而釋之。《廣記》卷四三七。

裴度

裴令公度，性好養犬。凡所宿設燕會處，悉領之。所食物餘者，便和碗與犬食。時子婿李甲見之，數諫。裴令曰：「人與犬類，何惡之甚？」犬正食，見李諫，乃棄食，以目視李而去。裴令曰：「此犬人性，必讐於子。竊慮之。」李以爲戲言。將欲午寢，其犬乃蹲而向李。李見之，乃疑犬讐之。犬見未寢，又出其戶。李見犬去後，乃以巾櫛安枕，多排衣服，以被覆之，其狀如人寢。李乃藏於異處視之。逡巡犬入其戶，將謂李已睡，乃跳上寢牀，當喉而嚙。嚙訖知謬，犬乃

下牀，憤跳號吠而死。《廣記》卷四三七

胡志忠

處州小將胡志忠，奉使之越。夜夢一物，犬首人質，告忠曰：「某不食歲餘，聞公有會稽之役，必當止吾館矣。能減所食見沾乎？」忠夢中不諾，明早遂行，夜止山館。館吏曰：「此廳常有妖物，或能爲祟。不待寢食，請止東序。」忠曰：「吾正直可以御鬼怪，勇力可以排奸邪，何妖物之有！」促令進膳。方下筯次，有異物其狀甚偉，當盤而立。侍者懼退，不敢傍顧。志忠徹炙，乃起而擊之，異物連有傷痛之聲，聲如犬，語甚分明，曰：「請止！請止！若不止，未知誰死。」忠運臂愈疾，異物又疾呼曰：「斑兒何在！」續有一物自屏外來，閃然而進。忠又擊之，然冠墮帶解，力若不勝。僕夫無計能救，乃以簪撲，羅曳入於東閣。顛仆之聲，如壞牆然。未久，志忠冠帶儼然而出，復就盤命膳。卒無一言，唯顧其閣，時時咨嗟而已。明旦將行，封署其門，囑館吏曰：「俟吾回駕而後啓之。爾若潛開，禍必及爾。」言訖遂行。旬餘乃還，止於館，索筆硯，泣題其戶曰：「恃勇禍必嬰，恃強勢必傾。胡爲萬金子，而與惡物爭！休將逝魄趨府庭，止於此館歸冥冥。」題訖，以筆擲地而失所在。執筆者甚怖，覺微風觸面而散。吏具狀申刺史，乃遣吏啓其戶，而志忠與斑黑二犬，俱仆於西北隅矣。《廣記》卷四三八

李汾

李汾秀才者，越州上虞人也。性好幽寂，常居四明山。山下有張老莊，其家富，多養豕。天寶末，中秋之夕，汾步月於庭，撫琴自適，忽聞戶外有歎美之聲，問之曰：「誰人夜久至此山院？請聞命矣。」俄有女子笑曰：「冀觀長卿之妙耳。」汾啓戶視之，乃人間之極色也，唯覺其口有黑色。汾問曰：「子得非神仙乎？」女曰：「非也，妾乃山下張家女也，夕來以父母暫過東村，竊至於此，私面君子，幸無責也。」汾忻然曰：「娘子既能降顧，聊可從容。」女乃昇階展敘，言笑談謔，汾莫能及。夜闌就寢，備盡綰繾，俄爾晨雞報曙，女起告辭。汾意惜別，乃潛取女青氍履一隻，藏衣笥中。時汾欹枕假寐，女乃撫汾悲泣，求索其履，曰：「願無留此，今夕再至。」脫君留之，妾身必死謝於君子。」汾不允，女號泣而去。汾覺，視牀前鮮血點點出戶。汾異之，乃開笥視青氍履，則一豬蹄殼耳。汾惶駭，尋血至山前張氏溷中，見一牝豕，後足剗一殼。豕視汾，瞋目咆哮，如有怒色。汾以事白張叟，叟卽殺之。汾乃棄山院，別遊他邑。《廣記》卷四三九

崔商

元和中，荊客崔商上峽之黔。秋水既落，舟行甚遲。江濱有溪洞，林木勝絕，商因杖策徐

步，窮幽深入。不三四里，忽有人居，石橋竹扉，板屋茅舍，延流詰曲，景象殊迴。商因前詣，有尼衆十許延客，姿貌言笑，固非山壑之徒。卽升其居，見廷內舍上，多曝果栗，及窺其室，堆積皆滿。須臾，則自外齋負衆果累累而去。商謂其深山窮谷，非能居焉，疑爲妖異，忽遽而返。衆尼援引留連，詞意甚懇。商既登舟，訪于舟子，皆曰：「此猿猱耳，前後遇者非一。賴悟速返，不爾幾爲所殘。」商卽聚僮僕，挾兵杖，亟往尋捕，則無踪跡矣。《廣記》卷四四五

徐安

徐安者，下邳人也，好以漁獵爲事。安妻王氏，貌甚美，人頗知之。開元五年秋，安遊海州，王氏獨居下邳。忽一日，有一少年狀甚偉，顧王氏曰：「可惜芳艷，虛過一生。」王氏聞而悅之，遂與之結好，而來去無憚。安既還，妻見之，恩義殊隔。安頗訝之。其妻至日將夕，卽飾妝靜處，至二更乃失所在，迨曉方回，亦不見其出人之處。他日安潛伺之，其妻乃騎故籠從窗而出，至曉復返。安是夕閉婦于他室，乃詐爲女子妝飾，袖短劍，騎故籠以待之。至二更，忽從窗而出，徑入一山嶺，乃至會所，帷幄華煥，酒饌羅列。座有三少年，安未及下，三少年曰：「王氏來何早乎？」安乃奮劍擊之，三少年死于座。安復騎籠，卽不復飛矣。俟曉而返，視夜來所殺少年，皆老狐也。安到舍，其妻是夕不復妝飾矣。《廣記》卷四五〇

僧晏通

晉州長寧縣有沙門晏通，修頭陀法。將夜，則必就叢林亂塚寓宿焉。雖風雨露雪，其操不易，雖魑魅魍魎，其心不搖。月夜，棲於道邊積骸之左。忽有妖狐踉蹌而至，初不虞晏通在樹影也，乃取髑髏安於其首，遂搖動之，儼振落者，卽不再顧，因別選焉，不四五，遂得其一，岌然而綴。乃褰擷木葉草花，障蔽形體，隨其顧盼，卽成衣服。須臾化作婦人，綽約而去。乃於道右，以伺行人。俄有促馬南來者，妖狐遙聞，則慟哭于路，過者駐騎問之，遂對曰：「我歌人也，隨夫人奏，今曉夫爲盜殺，掠去其財，伶俜孤遠，思願北歸，無由致。脫能收採，當誓微軀，以執婢役。」過者易定軍人也，卽下馬熟視，悅其都冶，詞意叮嚀，便以後乘挈行焉。晏通遽出，謂曰：「此妖狐也，君何容易！」因舉錫杖叩狐腦，髑髏應手卽墜，遂復形而竄焉。《廣記》卷四五一

按：本條明鈔本《廣記》作《纂異記》，待考。

薛夔

貞元末，驍衛將軍薛夔，寓居永寧龍興觀之北。多妖狐，夜則縱橫，逢人不忌。夔舉家驚恐，莫知所如。或謂曰：「妖狐最憚獵犬。」西鄰李太尉第中鷹犬頗多，何不假其駿異者，向夕以待

之？夔深以爲然，卽詣西鄰子弟，具述其事，李氏喜聞，羈三犬以付焉。是夕月明，夔縱犬，與家人輩密覘之。見三犬皆被羈勒，三狐跨之，奔走庭中，東西南北，靡不如意。及曉，三犬困殆，寢而不食。纔暝，復爲乘跨，廣庭蹴踘，犬稍留滯，鞭策備至。夔無奈何，竟徙焉。《廣記》卷四五四

朱覲

朱覲者，陳、蔡遊俠之士也。旅遊于汝南，栖逆旅，時主人鄧全賓家有女，姿容端麗，常爲鬼魅之幻惑，凡所醫療，莫能愈之。覲時過友人飲，夜艾方歸，乃憩歇于庭。至二更，見一人着白衣，衣甚鮮潔，而入全賓女房中。逡巡，聞房內語笑甚歡，不成寢，執弓矢於黑處，以伺其出。候至雞鳴，見女送一少年而出，覲射之，既中而走，覲復射之，而失其跡。曉乃聞之全賓，遂與覲尋血跡，出宅可五里已來，其跡入一大枯樹孔中。令人伐之，果見一蛇，雪色，長丈餘，身帶二箭而死。女子自此如故，全賓遂以女妻覲。《廣記》卷四五六

裴仙

唐裴仙，開元七年都督廣州。仲秋夜漏未艾，忽然天曉，星月皆沒，而禽鳥飛鳴矣。舉郡驚異之，未能諭，然已晝矣。裴公於是衣冠而出，軍州將吏則已集門矣。遽召參佐泊賓客至，則皆異

之。但謂衆惑，固非中夜而曉。卽詢挈壺氏，乃曰：「常夜三更尚未也。」裴公罔測其倪，因留賓客於廳事，共須日之昇。良久，天色昏暗，夜景如初，官吏則執燭而歸矣。詰旦，裴公大集軍府，詢訪其說，而無能辨者。裴因命使四訪，闔界皆然。卽令北訪湘嶺，湘嶺之北，則無斯事。數月之後，有商舶自遠南至，因謂郡人云：「我八月十一日夜舟行，忽遇巨鼃出海，舉首北向，而雙目若日，照耀千里，毫末皆見。久之復沒，夜色依然。」徵其時，則裴公集賓寮之夕也。《廣記》卷四六六

鄧元佐

鄧元佐者，潁川人也，遊學於吳。好尋山水，凡有勝境，無不歷覽。因謁長城宰，延挹託舊，暢飲而別。將抵姑蘇，誤入一徑，甚險阻紆曲，凡十數里，莫逢人舍，但見蓬蒿而已。時日色已暝，元佐引領前望，忽見燈火，意有人家，乃尋而投之。既至，見一蝸舍，惟一女子，可年二十許。元佐乃投之曰：「余今晚至長城訪別，乘醉而歸，誤入此道。今已侵夜，更向前道，慮爲惡獸所損，幸娘子見容一宵，豈敢忘德。」女曰：「大人不在，當奈何！況又家貧，無好茵席祇待。君子不棄，卽聞命矣。」元佐餒，因舍焉。女乃嚴一土榻，上布軟草。坐定，女子設食，元佐餒而食之，極美。女子乃就元佐而寢。元佐至明，忽覺其身卧在田中，旁有一螺，大如升子。元佐思夜來所餐之物，意甚不安，乃嘔吐，視之，盡青泥也。元佐嘆咤良久，不損其螺。元佐自此棲心於道門，永絕

遊歷耳。《廣記》卷四七一

孫氏

有孫氏求官，夢雙鳳集其兩拳，以問占者宋董。曰：「鳳凰非梧桐不棲，非竹實不食。卿當大凶，非苴杖，卽削杖。」後孫氏果遭母喪。《廣記》卷二七六

劉玄

宋中山劉玄，居越城。日暮，忽見一著烏袴褶來取火，面首無七孔，面莽黨然。乃請師筮之。師曰：「此是家先代時物，久則爲魅殺人。及其未有眼目，可早除之。」劉因執縛，刀斷數下，乃變爲一枕。此乃是祖父時枕也。《廣記》卷三六八

游先朝

廣平游先朝，喪其妻。見一人著赤袴褶，知是魅，乃以刀砍之。良久，乃是已常著履也。《廣

記》卷三六八

按：以上三條魯迅輯《古小說鉤沉》均收入郭季產《集異記》，附錄備考。

朱休之

有朱休之者，元嘉中，與兄弟對坐之際，其家犬忽蹲視二人而笑，因搖頭而言曰：「言我不能歌，聽我歌梅花。今年故復可，那汝明年何！」其家斲犬不殺。至梅花時，兄弟相鬪，弟奮戟傷兄，收繫經年。至夏，舉家疫死。《廣記》卷四三八

按：此條記晉元嘉中事，不類薛著，疑亦出郭季產《集異記》。《太平御覽》卷九七〇引《述異記》與此略同。

張華

張華字茂先，晉惠帝時爲司空。于時燕昭王墓前，有一斑狸，積年能爲幻化，乃變作一書生，欲詣張公，過問墓前華表曰：「以我才貌，可得見張司空否？」華表曰：「子之妙解，爲無不可，但張司空智度，恐難籠絡。出必遇辱，殆不得返，非但喪子千歲之質，亦當深誤老表。」書生不從，遂詣華。華見其總角風流，潔白如玉，舉動容止，顧盼生姿，雅重之。於是論及文章，辨校聲實，華未嘗聞此。復商略三史，探蹟百家，談《老》、《莊》之奧區，被《風》、《雅》之絕旨，包十聖，貫三才，箴八儒，擿五禮，華無不應聲屈滯，乃歎曰：「天下豈有此年少！若非鬼怪，則是狐狸。」書生乃曰：「明公當尊賢容衆，嘉善而矜不能，奈何憎人學問！墨子兼愛，其若是耶！」言卒，便請退。

華已使人防門，不得出，既而又謂華曰：「公門置甲兵欄騎，當是疑于僕也。將恐天下之人，捲舌而不言；智謀之士，望門而不進。深爲明公惜之。」華不應，而使人禦防甚嚴。豐城令雷煥，博物士也，謂華曰：「聞魑魅忌狗，所別者數百年物耳。千年老精，不復能別，唯有千年枯木，照之則形見。」燕昭王墓前華表，已當千年。」乃遣人伐之。使人既至，華表嘆曰：「老狸自不自知，果誤我事。」于華表空中，得青衣小兒，長二尺餘，將還至洛陽，而變成枯木。燃之以照書生，乃是一斑狸。茂先嘆曰：「此二物不值我，千年不可復得！」《廣記》卷四四二

按：此條本事亦見《續齊諧記》及《搜神記》（二十卷本卷十八、八卷本卷四），文字略異，疑非薛著，附錄備考。

鄭綢拜相

唐丞相鄭綢宅在昭國坊南門，忽有物投瓦礫，五六夜不絕。及移於安仁西門宅避之，瓦礫又隨而至。久之，復還昭國。鄭公歸心釋門，宴處常在禪室。及歸昭國，入門，蟾子滿室，懸絲去地皆一二尺，不知其數，其瓦礫亦絕。翌日遂拜相。此最爲靈異也。《分門古今類事》卷四

按：此條《廣記》卷一三七引作《祥異集驗》。

附錄

《唐書·藝文志》內部小說家類：薛用弱《集異記》三卷。字中勝，長慶光州刺史。

《宋史·藝文志》小說類：薛用弱《集異記》一卷。

鄭樵《通志》卷六十五藝文略史類第五：《集異記》三卷。

晁公武《郡齋讀書志》卷三下小說類（王先謙校本）：《集異記》二卷。右唐薛用弱撰。集隋唐間談詭之事。一題《古異記》。首載徐佐卿化鶴事。

馬端臨《文獻通考·經籍考》卷二百十五小說類：《集異記》二卷（引晁氏語）。

胡應麟《少室山房筆叢》卷三十六《二酉綴遺》：《集異記》，河東薛用弱撰。載王之煥酒樓事，大

非實錄。且昌齡、適集中，絕少與之渙倡酬詩。又蕭穎士遇二少年，謂似鄱陽忠烈王，穎士實八世孫，聞言大駭。後會盱眙長勘發冢盜，乃知二少年實發鄱陽冢，忠烈貌如生，因知穎士狀類。此理或然。而《原化記》稱穎士遇老翁逆旅中，謂嘗爲蕭八代祖書佐，見穎士貌酷肖，不覺咨嘆。則《集異》所載誠有之，而《原化》因附會以爲神仙。第茂挺身遇此事，不自紀而人紀之，何耶？

《四庫全書總目提要》卷一四二小說家類：《集異記》一卷。薛用弱撰。案《唐書·藝文志》載用弱字中勝，長慶光州刺史，其里籍則未言。此本卷首題曰河東，然唐代士族，率題郡望，劉必彭城，李必隴西，其確生何地，則未之知。《三水小牘》（案：此條見《太平廣記》三一二卷所引）載其大和中自儀曹郎出守弋陽，爲政嚴而不殘。蓋在當時稱良吏，其事蹟亦無考也。是書所記十六條，晁公武《讀書志》稱其首載徐佐卿化鶴事。此本正以此條爲首，與晁氏所記合，蓋猶舊本。其敘述頗有文采，勝他小說之凡鄙，世所傳狄仁傑集翠裘、王維《鬱輪袍》、王積薪婦姑圍棋、王之煥旗亭畫壁諸事皆出此書。其《良常山新宮銘》、洪邁《容齋隨筆》推爲奇作。蘇軾《與子過詩》所謂「爾應奴隸蔡少霞，我亦伯仲山玄卿」者，即用其事。卷帙雖狹，而歷代詞人，恒所引據，亦小說家之表表者。陳振孫《書錄解題》（按：係晁氏《讀書志》之

誤。謂是書一名《古異記》，然諸家著錄俱無此名，不知振孫何本。又唐比部郎中陸勳亦有《集異記》，與用弱此本名同，故《文獻通考》題勳書曰《陸氏集異記》，以別於用弱書焉。

鄭振鐸《世界文庫》印《集異記》序：《集異記》二卷，唐薛用弱撰。《唐書》（卷五十九）云：用弱「字中勝，長慶光州刺史」。晁公武《郡齋讀書志》云：「《集異記》二卷，唐薛用弱撰。集隋、唐間談詭之事。一題《古異記》。首載徐佐卿化鶴事。」正和今本相合。惟《唐書·藝文志》作三卷，《宋史·藝文志》則作一卷，不知係卷帙分合的不同，還是內容有所逸失。《集異記》所錄僅十六則，但像《集翠裘》、《王維》、《王渙之》諸文，尤為後來作家所取資。狄仁傑事，清人裘璉曾作雜劇《集翠裘》。王維事，明王衡曾作雜劇《鬱輪袍》。而以旗亭畫壁事為題材的戲曲尤多。